

ASO LUA, 20 TESEMA 2022

Na toe faaauau Taulumaga a le Fono Aoaofa Faitulafono i le itula e 7:00 i le afiafi.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofa Faitulafono.

E momoli atu le faamalo i le tatou Maota mo lo outou onosai mai i le faaauauina o le tatou galuega.

I le faaauauina o le tatou galuega i lenei afiafi, e i ai le talitonuga a tatou mulimulitaia lava aiaiga o tatou Tulafono Tumau, e sologa lelei foi a tatou taulumaga ma vave ai foi ona tatou malolo. Atonu o se avanoa lelei foi lenei e tuualalo ma fautua atu ai le Nofoa i sui usufono o le a sausaunoa, ina ia agai sao a outou saunoaga i faamoemoega mai itu aoga o le Tulafono Tau Faaofi, ae taatia mea taitasi e oo lava i ai a outou saunoaga pe a iloilo auiliili a tatou Tulafono Tau Faaofi.

E faataatiaese Taulumaga i le itula e 1:00 i le aoauli ua maea le saunoaga a le sui usufono mamalu mai Aleipata Itupa i Luga. Ia, o le avanoa lenei o se tasi o sui usufono mamalu e saunoa.

Ia, tulai mai le sui usufono mamalu mai Falelatai ma Samatau.

Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau): Ou te manatu ua maua se faasiligamalosia i lau Afioga i le Fofoga Fetalai faapea foi le paia maualuga o le Palemene i faiga malologa i le taimi ua tuanai aua le faaauauina o le tatou Fonotaga i lenei afiafi.

Ou te manatu o paia o lenei Maota aemaise le faafogafoga maimoa tapuai mai a si o tatou atunuu, o le a faataalolo. E manatu o lea ua maea ona paelago i le taeao ua sola. E manumanu foi i le tatou taimi.

Ua maea foi ona e lalagi sugalu aua le alofa ma le agalelei o le Atua. Ia tatou tiu ia i le latasi o lou sa folau. Ae ua ou tulai atu i le agaga faaaloalo e fia fai foi se sao o lenei itumalo o Falelatai ma Samatau i le Tulafono Tau Faaofi o Teuteuga o le Tulafono o le Faasologa o Tiute 2022.

E muamua ona momoli atu le faafetai ma le faamalo i le Afioga i le Minisita po o le Afioga i le Sui Palemia faapea foi le Pulega ma le Matagaluega ona o le tapenaina o lenei Tulafono taua e pei ona lauliliuina e le tatou Palemene i lenei foi aso ma lenei afiafi.

O le vaavaai a lenei itumalo i le Tulafono Tau Faaofi, o se Tulafono lelei ma taua, ma o lo o i ai foi le lagolago i lona itu aoatetele. Ae pau lava nai tuualalo e fia tuuina atu pea i lau Afioga i le Minisita ma le Matagaluega ia faapea foi le Malo. O le vaitaimi lenei e le o po se lilo i le alalaga o le atunuu i le taugata o le soifuaga o lo o i ai, e le tau faamatalaina lena vaega. Ae sa ou manatu ai i se faamama avega mo le mamalu o le atunuu. O lea ua matau atu, faafetai. E lagolagoina e lenei itumalo le tuu i luga o tiute ma lafoga o meaai gaoa, ina ia faaitiitia faamai le pepesi o lo o suffer ai le tatou atunuu i lenei foi vaitau.

Ae pau lava si tuualalo ona o lea e vaavaai atu o le isi vaega o le Tulafono, o lo o tuu i lalo tau o oloa po o masini tekonolosi, computers ia ma telefoni. A o le vaavaai a lenei itumalo, e tataua ona vaavaai i le mea e ave i ai le faamuamua, aemaise lava le vaitau lenei, le vaitau o lo o fia maua e tagata se fesoasoani ona o le taugata o le soifuaga. Ae maimau pe ana faapea e trade off le tuuga i luga o tiute ma lafoga i meaai gaoa, ae tuu i lalo pe fai se famama avega mo meaai ma vaiinu taumafa e masani ona faalagolago i ai lo tatou atunuu i aso uma tai pei o le moa. Ae peitai o le vavaai atu e le o maua se faamama avega lea mo le mamalu o le atunuu. E fia faafesili ai foi i lenei Tulafono, e fia malamalama lenei sui usufono ma lenei itumalo, po o le a se aafiaga o tupe maua a le tatou Matagaluega po o le Malo pe a faatino le teuteuga o le Tulafono lea ua aumai. Pe faamata e alu i lalo tupe maua a le Malo pe o le a alu i luga tupe maua a le Malo? E pei o nai vaega na e fia malamalama atili ai lenei sui usufono ma lenei itumalo, ae ua lagolagoina le aotelega o le Tulafono. Ae pei o nai tuualalo na. E pei foi ona silafia le tele o le mau faafitauli ua tulai mai i upega tafailagi i le faaogaina o telefoni, computers ma tulaga faapena. A o lea e matau atu lenei itumalo, o lea o le a ave i ai le faamamaavega e faataugofie. Ae sa manatu o le manaia ia pe ana faapea e trade off ma meaai ma vaiinu o lo o faamoemoe i ai si o tatou atunuu.

O si aotelega lea o se manatu o lenei itumalo lau Afioga i le Fofoga Fetalai, ae momoli atu le faafetai ma le faamalo i le afioga i le Minisita ma le Matagaluega i le tapenaina o lenei Tulafono. Ia manuia le tatou afiafi. Faafetai.

FOFOGA FETALAI: Malo faafetai, malo saunoa. Ia o lea foi ua aumai lou sao e tusa o le tatou Tulafono, malo lava faafetai. Ia, o le avanoa lenei o se tasi o sui usufono mamalu.

Ia o lea ua vaai atu ua fou mai le sa o le sui usufono mo Salega 1. Tulai mai lau Afioga i le sui usufono mamalu.

Afioga FEPULEAI FAASAVALU FAIMATA SU'A (Salega 1): Faafetai mo le avanoa i lau Afioga i le Fofoga Fetalai ua mafai foi ona avatu se fesoasoani a lenei itumalo po o lenei usugafono o Salega 1. O lou

tulai i lenei afiafi e avatu foi se sao ma faaleo foi le agaga faafetai i lenei Tulafono Tau Faaofi. Ae e i ai nai vaega taua e fia fesiligia ai foi le Minisita e ona le Tulafono, pe fesoaoani atu ai foi i se isi vaega pe a faapea e aoga se tuualalo a Salega.

I lau matau i ai i le Tulafono Tau Faaofi, e i ai vaega ua alu i lalo le pasene, e i ai foi vaega ua siitia i luga. I lau la lea po o le vaai a lenei itumalo, e faaleai tele se eseese, na o ni nai vasevase lava o lo o fai ai nai fesuaiga. Ae o le tulaga lea e faamamafa i ai le agaga o le Tulafono, ina ia taofia meataumafa ia e faatuputele ai pea faamai le pipisi, meaai gaoa.

A o le fesili; o le a le mea tatou te le taofia ai loa taumafa ia e aumai totonu o le tatou atunuu lea e tele ai le gao? E taua foi i nisi o sui usufono o le mamoe lea e aumai nei o le mafiafia o le mea gaoa ae na o le ponaivi lava e pipii ai sina anogase laitiiti. Ae mo le silafia e le Maota lau Afioga i le Fofoga Fetalai ma le paia o le Palemene, o tatou uma a lea e malaga i atunuu mamao, e seasea tatou maua ni mamoe faapea tout e taumamafa ai ma aai ai pe a tatou o atu i atunuu mamao. E foliga mai e le o faatauina i atunuu mamao le mamoe lea e aumai, e le o faatagaina i atunuu mamao lea e aumai ai le manufasi lea ituaiga aano ia. O lona uiga e tataua ona fai se Tulafono e fai i kamupani ia e aumaia meaai i totonu o le atunuu e aua le toe aumaia ituaiga manufasi ia. Aua e palasi lava le mamafa o le avega i le tatou atunuu i le tofogiina o lafoga pe a sii i luga le tiute. Ae a taofi loa manufasi ia e aumai pei o mamoe ia e mafiafia le mealololo, ia ua tele le faamama avega i le tatou atunuu, tele foi le laveaiina o le soifua ma le ola o Samoa ma ona tagata mai faamai ia. E pei la o le moa, ou te manatua lava le matou malaga na taamilo lea foi sa faailoa e le Minisita o Faatoaga, tasi lea atinae tele o lo o ua amata ona fotuai mai i totonu o le atunuu e ala foi i ana taumafaiga i le mea lea o le moa. E tele lava ina tatou o atu tatou te le vaai i moa ia tatou te aai tulou ma tou taumamafa ai i Samoa nei. A o le moa la e faaoga i fafo, e tasi lava le masina aumai faaoga, ae leai se lololo o i ai. E leai foi se tulaga e ono maua ai i se faamai. A o tatou, o lea tatou te vaai uma atu lava o le moa e tasi se vaemoa a pamu i ai le vailaau, lona uiga a faapea e tasi le kilo o le vaemoa, e pamu lava i ai le vailaau lua kilo. O le isi kilo vailaau la lea tatou te mamai ai. Ia pei o le tulaga lea, faafetai i le Afioga i le Minisita mo le Tulafono. Ae pe le alagataua ona fai se isi Tulafono e taofi ai la mea ia e faaofi mai le tatou atunuu, ona o tatou lava, tatou te lauga a ma pepese ma alalaga, taofi le taumafaina o meaai e ono aafia ai le soifua maloloina. Ae pei a leai se gao o se meaai se i tulou, e pei e faalesee le mea.

Ia, pei la tatou te tigaina lava e fai ma fai ma fai tulaga o polokalame ma aoga, ia a o le filifiliga lava a le tagata, e mai ai lava ia.

Ia o le tulaga lea ma le tuualalo i lau Afioga i le Minisita e tauala atu i le Nofoa, pe le toe silasila i kamupani ia, aua pei e foliga mai po o le numera 3 ea lea e aumai ia tatou a o le numera 1 la e i fafo. Ae sili le aumai o le

numera 1 la e i fafo ma le numera 2, ae taofi loa le numera 3 lea e tele ina lau mai i le tatou atunuu.

Ia o se sao lena o lenei itumalo lau Afioga i le Fofoga Fetalai, o se tuualalo aua foi le Tulafono tau Faaofi, ae lagolagoina e lenei itumalo le Tulafono. Faafetai.

FOFOGA FETALAI: Malo saunoa. Ia o lea lava e matau atu e le Nofoa e tagatasi lava saunoaga i le tatou Tulafono Tau Faaofi. Ia, e i ai le manatu, ia saunoa mai le sui usufono mo Safata 1.

Afioga LEAANA RONNIE POSINI (Safata 1): Lau Afioga i le Fofoga Fetalai aemaise foi le paia o le Palemene, le affio o lau Afioga i le Taitai o le Malo, le Kapeneta ma Minisita Lagolago, aemaise le mamalu o le Palemene. E fia faaali foi se manatu o lenei itumalo e uiga i le Tulafono Tau Faaofi ua i inei i lumamea i totonu o le Palemene.

O le taua ia o lau faalogologo analeila i le saunoaga a le Minisita o le Soifua Maloloina, ona o mea ia o faamai le pipisi ae mafua ona o meataumafa, lea ua tele ai gasegase i totonu o le tatou atunuu, lea la ua siitia ai tatou tiute i meataumafa ia. A o meataumafa foi ia lau Afioga i le Fofoga Fetalai, o lea e tele i ai le mataiai a le tatou atunuu. O lau la lea faitau, e matua tele foi nai a tatou seleni o lo o maua ai, ae silisili ona taua le tulaga o le soifua maloloina. I lau lea faitau pei o fetuunaiga ia a le tatou Malo. O le agaga faafetai lea. A o lau vaavaai atu i le faataatiaga mai e faafetai i le Minisita i le aumaiga o le pepa lea sa tatou fesiligia i le aso ananafi, o lea ua taoto uma mai ai le fesuiaiga o le tau o tiute, tulaga o le tiute, o le tulaga o le excise tax, faaopoopo i ai ma le VAGST ona fetuunai lea. A o lau faitau atoa i le aotetelega o le pepa lea na tauaao, e i ai lona siiga laitiiti i luga o tau o mea ia. A o lau lea faitau, o le a toe pau foi i le mamafa o le tatou atunuu le tau o meataumafa nei. Aua i lau autilo ona o mea ia e tele ina manaomia e le tatou atunuu, meataumafa ia a o lea ua ave i ai le mamafa o tiute.

Ae taua i lou mafaufau o tupe maua a lo tatou Malo. O lea foi ua maua o se tasi o tatou Minisita a le tatou Kapeneta, ia tatou tatalo ia i le Atua ia vave ona toe faafoi lona soifua maloloina, lea ua taua o lea na aumai le vaalele faapitoa lea na totogi e le tatou Malo e agai atu ai e saili togafiti, a o lea e taua po o se gasegase o le fatu. O meaai lava nei meatausami lava nei o faamai e tutupu mai meataumafa nei.

A o le agaga lena o lea ou te faamalo ai foi i le tatou Malo i le sailiga o tatou seleni, aua la e le gata foi i mea ia o gasegase, a o mea foi e feafioai ai le tatou Malo ma atinae o le tatou Malo, ma maua ai tupe nei, e ui lava ina ua i le tulaga foi lea ua toe pau atu le mamafa i le tatou atunuu i tau, ae sili ona taua foi le vaavaai a le tatou Malo, e maua a tatou seleni e atiae ai le tatou Malo. Ia, ma le agaga faaaloalo. Faafetai.

FOFOGA FETALAI: Malo saunoa. Ia o lea ua matau atu ua fou mai le sui usufono mamalu mai Vaimauga 1. Tulai mai le sui usufono mamalu.

Afioga SULAMANAIA FETAIAI TAUILIILI TUIVASA (Vaimauga 1): Masalo ae le i faia se sao o lenei itumalo, e muamua ona ofo alofa ma faatalofa atu i le afio o lau Afioga i le Fofoga Fetalai. Malo le tauatai malo foi le faafoega o le sa o le atunuu.

E faatalofa atu foi i lena talaga atoa i le afio o lau Afioga i le Tamaitai Palemia, le Afioga i le Sao Faapito Fiamē Mataafa. Afio foi le Afioga i le Sui Palemia Tuala Ponifasio Tuala, aemaise o le afifio o Afioga i alii ma tamaitai Minisita o le Kapeneta, faapea foi nai Minisita Lagolago, aemaise foi le Afioga i le Sui Fofoga Fetalai.

Liliu mai lenei itu, ia faatalofa foi ma ofo alofa atu i le afio o le Afioga i le Sui Taitai aemaise o sui usufono mamalu o le Palemene o Samoa i afioga i alii ma tamaitai sui usufono.

E faatalofa foi ma ofo alofa atu le Vaimauga 1 i le afifio o Ofisa Sili o Pulega o Matagaluega a le Malo aemaise foi o Faalapotopotoga, aemaise foi o le Susuga i le Failautusi ma le Ofisa o le Fono.

Ia ae le i fai se sao o lenei itumalo, e muamua foi ona matou faatalofa atu ma faanoioi atu i lau Afioga i le Fofoga Fetalai ona o le lagia foi o si o matou itumalo e nai o matou tama matutua, ua lagia ai Niniva ma Punialavaa i le valaau a le Atua i le afioga ia Teomatavui Lavea. Ia faamaise le agaga o le Atua i lau Afioga i le faletua ia Faapale aemaise foi le nofo a alo faapea foi lau Afioga Teo aemaise o le afafine ia Mata ma Jeremiah Tauiiili.

E faapena foi ona faamaise atu le agaga o le Atua i le lagia o Lalotea o le malae o le faautugatagi a Tumua ona o le valaau paia a le Atua i le afioga ia Tauiiili Leo Bartley o le sa galue i le tatou Malo. Ia faamaise le agaga o le Atua i le afioga i le faletua aemaise o le fanau faanoanoa. So o se atunuu lava e siitia le tulaga i le lafoga, e solotetee, ona e mafua i se a? O le a siitia ai le tamaoaiga. E toute vaai atu i atunuu la e i o pe Isene lava, pe tasi pasene e solotetee lava. E mafua i se a? O le a le lava le faasoā, ona o atunuu la ua i ai lava tulaga i le paketi. O le mea lena e ala ai ona solotetee. A o Samoa, e ese Samoa aua e i ai faamanuiaga a le Atua o Isaraelu a lenei. E te nofo fua i lou fale, e maua mai lau meataumafa i tuafale, i tuamaota, ma e tele meaai e maua fua. A o le lafoga lenei, e momoli le agaga faafetai i le Afioga i le Minisita. E fiafia lava lenei sui usufono pe a aumai ni Tulafono e toe teuteu, e iloa ai ua i ai se Minisita mataala, aemaise o le Matagaluega lenei po o le 90% o le tamaoaiga o si o tatou atunuu o lo o faamoemoe i le aoina mai e le Matagaluega o Tiute aemaise o le Ofisa o Lafoga. Faamalo. E ui lava e le o maua se faatumutumuga o le Matagaluega lea, ae o lo o matau lava o lo o galulue pea tupu ma tamalii ua

masani i le tulaga i le fesoasoani ma le tautuaina o si o tatou atunuu. O le aotelega o le Tulafono e lagolagoina e lenei sui usufono. Faamalo. O le tulaga i le lafoga lea ua toe tuu i luga o le tau o le suavai, tulaga ia local manufacturers. E saolele lava le tulaga sa i ai, ona ua uma ona tatou sainia mea o Tulafono faava-o-Malo a le WTO, ina ia aua ne i faailogalanu ai ni tulaga faapena i lafoga, e tutusa lava le fai vai e aumai overseas ma le fai vai lea e fai iinei i Samoa. Ae peitai ane la ua leva ona i ai le faamatuuina atu e pay ni excise o vaega ia locals, ae sa tuuavanoa lava le Matagaluega ona e le i tuai tele. Ia o lea la ua oo mai le taimi o lea ua tele le fai vai iinei i Samoa, ia faafetai i lau Afioga i le Minisita ua afea nai tagata ia. Ae pau lava le tatalo, o lenei e i ai i ina le ki ma le tatala, amata atu i le 2 sene agai i luga nai o tatou tagata, ina ia faapena foi aua leaga e tutusa lelei le treat ina o vai ia import mai overseas company ma tatou vaega ia e iinei. E lagolagoina le tulaga lenei, a o le tatalo, toe tuutuu laitiiti lava i lalo pasene o le vaega ia fai vai.

Ou te lagolagoina le Tulafono lea, o lea ua pei ona saunoa foi nisi o sui usufono, o le tamaoiga o le tatou atunuu lea ua i ai nei ma le taugata o le soifuaga, ua fai lava sina maualuga. A o le tulaga lea e i ai tupe maua ua maualalo lava. Lona uiga la e toe sii loa se lafoga po o le a se tulaga ua i ai, ua toe pau foi le mamafa o le avega i le mamalu o le atunuu. E moni lava o lea ua faamatu i luga le lafoga i le tulaga ona o le talosaga foi a le Matagaluega o le Soifua Maloloina, ae na ou faalogo i le saunoaga a le Taitaifono o le matou Komiti ananei, o le a la le mea e le tuu ai loa? Aua e le mafai lava ona tuua e le tatou atunuu le o e faatau le mamoe tulou, po o le ua mamoe po o le pau mamoe po o le vae mamoe. Na ou fesili ananei i nisi o faleoloa o lou itumalo, e fia le tau o le pusa mamoe? O le tala a le faioloa lea e \$400 ma ona tupu, ae o lea ua pau atu, a fia manao lau Afioga i le sui usufono ia pau atu i le \$380. Ae ou te le i manao e faatau sa ou alu e tau sutesue po o le a le tau. E \$400 ma ona tupu. E le mafai la e le mamalu o le atunuu. Lona uiga la a toe tuu atu la ma le isi pasene lea sa tuusaunoa lea ua tuu i ai le pasene lea e 5pasene, o lona uiga la, ua toe oo foi i luga le tau o le soifuaga. O lona uiga o le vaiaso lea pe a effect le Tulafono lenei, ua le \$400, ae ua \$500. O ai e pau ai? E pau i tagata lautele, pau lava i tagata lautele, tatou. Ona e le mafai foi ona nofonono le faipisinisi ia, ona o lea ua tiute. Ae o lau tatalo i lau Afioga i le Minisita aemaise ua tulai mai outou i le foe, o lenei e ia te outou le malosiaga, ina ia aveese ai lafoga ia, aveese tiute mai tulaga nei o mamoe, ona leai lava lea o se... e aumai sao lava, e leai se tatou malosiaga e oo atu i le freight. A o tatou iinei i Samoa, o lenei e ia te outou le malosiaga e faatonuina ai le revenue board poo fea lea e control mai ai le mea, ina ia mafai. Ona o le a? Ina ia toe alu ifo ai i lalo le tau o le soifuaga lea. E le ona o le... ae o le lalolagi. O lea foi ua tatou vaai lenei Palemene i le sioki o le aniani. Mai fea? Delay mai ma tuai mai vaa e omai. Ae faafetai lava i le Minisita o Faatoaga e taulagalaga lava

i locals. E pei o le Tulafono lea ua aumai e faailogalanu, e oso i luga le tau o le mamoe, ia ae oso i lalo le tau o mea ia o fualaau aina e aumai fafo. Lona uiga, ua leai se faatauvaga i nai o tatou lava faifaatoaga locals ia mai i inei. Lona uiga, ta te le fia sau i le maketi, ta te alu lava i le supermarket aua o lea ua... Ae maumau e pe ana faapea i le tulaga lena i mea la e aumai fafo, ae taumafai e encourage tatou e faatau lava tatou kapisi ma mea ia maua i inei i le lotoifale.

Lau Afioga i le Fofoga Fetalai e le tele se sao, a o le isi mea taua e fia lagolagoina ai e lenei itumalo le Tulafono o le tamaoaiga o si o tatou atunuu ina ia fesoasoani ai aua e leai se isi mea pei o isi atunuu e maua mai le faamanuiaga mai le auro ma le koale. A o tatou, o mea na na fai e tatou atunuu ma le faigamalo ma isi, le tulaga lea o le tax system lea e i ai. O le tupe lava e te pay ina, that is your final tax, e le toe maua. Ona o le a? O mea lava ia o lafoga ia e tipi mai tulou i tatou totogi ma le aufaigaluega a le Malo ma so o se tagata, o i ina lea e tua i ai le Malo. O le system a Niu Sila ma isi atunuu e uma le tausaga toe fai lau tax return toe maua mai lau refund, a o tatou, e pei lava o le mea foi lenale na o le totogi lava alu atu ai lava e le toe maua se mea. Ona o le a? O le agaga lena e tua i ai tatou i totogi ia. A o le agaga lena e avatu ai i lau Afioga i le Fofoga Fetalai e lagolagoina ai e lenei itumalo.

A o le talosaga i lau Afioga i le Minisita, ia se i toe silasila ina ia mafai ona toe tuutuu laitiiti ifo lava i lalo le vai, ona e le o po se lilo, ua tatou vaai pei na o le tasi lava nai vai sa i ai i le amataga, o le taimi lenei, pei ua i ai nai faipisinisi mai fafo o lea ua latou gaosiaina lava le vai. Ia o le agaga la lena o le faamamaavega, ia mafai ona amata aua o lea ua leva ona approve e fai, ae le i mafai ona tagofia e le Matagaluega ona e le i tele se maketi. O lea la ua tele pisinisi ia, o le tatalo pe mafai ona amata malie atu i lalo i se 2sene pe 5sene e tuu i ai, ia ona aluatu ai lava lea i luga.

Lau Afioga i le Fofoga Fetalai, e pau lena o le sao o lenei itumalo ae manuia le Fonousu a le atunuu i toega o lenei afiafi.

FOFOGA FETALAI: Malo saunoa. Faafetai mo lou sao i le tatou Tulafono Tau Faaofi. Ia, o lea ua matau atu o lea ua fou mai le sa o le sui usufono mai...

Ia, Aliimalemanu, le sui usufono tamaitai mai Alataua Sisifo.

Afioga ALIIMALEMANU MOMOEMAUSU ALOFA TUUAU (Sui Usufono Tamaitai – Alataua Sisifo): E faatalofa atu i lau Afioga i le Fofoga Fetalai aemaise foi lena Itu o le Malu i le afio o lau Afioga i le Tamaitai Palemia, le Kapeneta, ma sui usufono mamalu o le Palemene, ia faapea foi lenei Itu o le tatou Maota.

E faatalofa atu foi i Ofisa Sili o Pulega o Matagaluega ua tatou faatasi i lenei itula afiafi. Ia, se i fai sina manatu o lenei usugafono i le Tulafono e uiga i tiute.

O le mataupu muamua e fia laga ai se manatu, o le faaititia lea o lafoga i telefoni. O lea sa maua le aoga o nei metotia faaneionapo i aoga a le fanau, e sao lelei. A o le popolega, o le siosiomaga. E pei lava ona tatou iloa le faafitauli ma le aafiaga numera tasi lea e i ai i le lalolagi, o aafiaga o le siosiomaga. Po ua i ai ni mea e fuafua mo le waste lea aua o le a taugofie. E sao o le a taugofie mo fanau, a o lea foi sa tatou iloa i le tele o tausaga ua tuanai le tau aumai o fesoasoani a atunuu i fafo sa aumai ai vaa e lau atu ai le tele o le waste management, i le tau faiga o le waste management a le tatou atunuu, i le avatuga o mea nei tau tekonoosi e ave i atunuu la e i o e ave i ai. O le atugaluga lena o lou sui usufono i le tulaga lea. Atonu i se isi itu, e lelei mo aoga, a o ai e pito i benefit ai i nei tulaga? Ou te lagona o kamupani telefoni, aua o lea e matau atu e tai 2% e pau ai lava i lalo tiute i tausaga uma. Atonu na o sina tamai vaega e aumai ia i tatou nei le au faatau, ae o kamupani telefoni o i latou na e aupito i sili ona i ai le faamanuiaga lea. Ae le mo tagata lautele, ae na o se fesoasoani atu lena i le vaega lea o le tatou Tulafono, se i vaai le tatou siosiomaga, ina ia i ai ni galuega e fai aua le dump ina o le waste lenei, ona o lea na tatou iloa lava mea sa tutupu i tausaga ua tuanai.

O lona lua e faauma atu ai o le Tulafono i le siitia lea o nisi o vaega o tiute i meataumafa. E pau lava le agaga e ala ai ona atugaluga i le Tulafono lenei, e ui ona o lea ua faapea mai ona o le taofia o meataumafa lea e faatupu ai faamai le pipisi. O le atugaluga o le mafaufau, ona o le fofoga taumafa o le atunuu. E pei ona maua i nisi o sui usufono, po o le a lava le taugata, ae o le fofoga taumafa o le atunuu, e faatau lava, pe oo i le \$400 po o le \$500, e taumafai lava e faatau. Sa faapea o le a avane se isi vaega i nisi o oloa ae aua lava nei lava nei aafia tele le fofoga taumafa o le tatou atunuu, i le siitia o tiute. Aua o lea e sao le saunoaga a le Minisita o le Soifua Maloloina, ona o le tau taofiofia o faamai le pipisi. Ae ou te talitonu lava au ia lou sui usufono, e mafua mai i totonu o tatou aiga, i le faatoa feola mai o a tatou fanau. E tatau o i ina e vaai i ai, e taumafai ai le galuega e foia ai le faafitauli lea, i faamai le pipisi. O se manatu vaivai lena o lenei usugafono. Manuia lau Afioga i le Fofoga Fetalai, manuia lenei Maota. Soifua.

FOFOGA FETALAI: Faafetai, malo. O le avanoa lea mo lau Afioga i le sui usufono mamalu mai Gagaifomauga 1.

Tofa Hon FAIMALOTOA KIKA IEMAIMA STOWERS-AH KAU (Gagaifomauga 1): E avea lenei avanoa e faatalofa aloaia atua i i lau afioga i le Fofoga Fetalai o le Maota. E faapena foi ona faatalofa atu i lena

Itu, i le Tamaitai Palemia, Sui Palemia, le paia i le Kapeneta, faapena foi i le saofaiga a Minisita Lagolago, faapena foi lenei Vaega i le matou Sui Taitai ma sui mamalu o lenei Itu.

E le tele se manatu, e talitonu o lea ua faaleo e le toatele o sui usufono mai analeila seia oo mai i lenei itula, ia nisi foi o tulaga sa faapena ona mafaufauina. Ae e momoli le faafetai a lenei itumalo i le Minisita, i le faatulai mai o lenei Tulafono. Ae momoli atua i le agaga faafetai, ae o se manatu e fia faaalua, lea foi ua uma ona faaleo, aemaise lava i le tulaga lea i taumafa. E fautuaina ma tuualalo atu pea lenei sui usufono, ina ia faapena ona matua tuuitiitia le toe faaofiina mai i totonu o taumafa nei e pei ona tatou le manaomia. E pei foi ona uunai mai e le Soifua Maloloina, o le tele o taumafa nei, lea e toe tele ai foi tupe a lo tatou atunuu, e toe togafitia ai le toatele o tagata, ua taugata tele foi le avatu ina o tatou tagata i atunuu mamao, mo togafitiga.

Ae manatu lenei itumalo i le tuualalo atu, silasila lo tatou Malo, i se faiga. I lau tilotilo i ai, e pei ona tau nei pusa pau mamoe, ou te fautuaina ou te le toe fia vaai ai au i se faleoloa, ua na o le gao, gao le mea o lo o i totonu o ia pusa mamoe. E \$400... e tau feoloolo la... e moni lava e taugata, a o la e taumafai o tatou tagata e faatau. A o le pusa lea, o lea ua ou molimau atu, leaga na otegia ai au i mea a le matou aulotu, ua ta te'i i le fetuli atu tamaiti e o e faatau mai mea e fai ai, ae fai mai, o la ua pau, i le faatoa faaofi maiga o nei pusa, ta te le o iloaina faapea ta ita o pusa mamoe. Ae fautuaina, aua nei toe aumaia nei ituaiga taumafa. Ma e lagolagoina e lenei itumalo le Tulafono lea. E talosagaina foi, le tuuitiitia i lalo ia taumafa o lo o manaomia, aemaise lava matou i Savaii, ua taugata tele mo matou i Savaii ia... O lenei e i ina le tofa ma le faautaga mamao, silasila i mea o lo o manaomia i aso faisoo, ona tuuitiitia lea i lalo, ae matua sii i luga ia mea nei lea e maua ai le mai, ma toe tele ai isi tupe a lo tatou atunuu e toe alu ai. O le...

FOFOGA FETALAI: Ia malie le sui usufono se i tuu atu le avanoa i le Minisita o Galuega Tetele ma Atinae.

Tofa Hon Olo Fiti Afoa Vaai (Minisita o Galuega, Felauaiga ma Atinae Eeseese): Lau Afioga e puupuu lava si faafesili. Ona e fou foi i lau faalogologo le mea lea o le pau mamoe sei tulou. E fou i lau faalogo e i ai se mea faapea o lo o faaogaina i taumafataga a le atunuu. Ae ou te talitonu lava e leai se mea faapena. E masalo po... o se mea lenei e fia maua mai se faamaumauga o lenei mea, pe o i ai ni mea faapena o taumamafa ai le atunuu ma import mai. Ma le faaloalo.

FOFOGA FETALAI: O le tulaga lenei o lea sa maua atu e le Nofoa. Ua taua lava e nisi o sui usufono le tulaga lea, ae ou te le o iloa po o i ai pau

mamoe i le Tulafono lea tatou te talanoaina nei. Ae taua foi le faafesili a le Minisita, ona o lea sa taua e nisi o sui usufono, ae lelei lava le malamalama o le tatou Maota.

Faaauau mai le saunoaga a le sui usufono mamalu.

Tofa Hon FAIMALOTOA KIKA IEMAIMA STOWERS-AH KAU: O le faafesili a le Minisita, masalo e le i silasila i ai ma e le i taumafa ai foi, ae pei e fai la ta ita... ona o le igoa lea o lo o faaigoaina ai e le toatele ua latou vaai i le pusa lea, o le igoa lea o lea e faaigoa ai. Ae le... ou te le iloa la, o lea foi e taua e le isi sui usufono, o le fatafata mamoe. Ae o lea e faaigoa e isi tagata o le pusa o le pau o le mamoe. O le tele e na o le mea lololo mea lololo e pei e faamalulu atu ai.

Tofa Hon Olo Fiti Afoa Vaai: Ia faafetai e le iloa po o le lamb rack, lea e faa-Samoa e le Sui Taitai, lea o lo o faapea mai o le pau mamoe. O lea e sao le saunoaga a le tamaitai sui usufono, o le fatafata mamoe.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e fesoasoani atu i le faafesili a le Afioga i le Minisita,

FOFOGA FETALAI: Ona sa taua i lau saunoaga.

Tofa Hon Lauofo Fonotoe Nuafesili Pierre Lauofo: O lea e sao le saunoaga a le sui usufono mamalu, lea e saunoa. A e faaafio i so o se faleoloa lava, ae fesili ai i le mea lea, e faasino atu ia oe. E leaga ua tolu faleoloa ua ou alu i ai, ae fesili atu i le... ae fai mai, o lea e maua le pau mamoe, o lea e maua le ua mamoe, o lea e maua...ioe, e maua foi i le wholesale, oloa siiatoa. E mafai ona faasino atua pe a fai le malologa, ona ta talanoa lea, aua o la foi na ou vaai ai ananafi i le isi foi faleoloa na ou alu i ai. E masalo o le tauga lea o lea e tau ai e le lautele i le tulaga foi lea, ae masalo e ese foi le tauga lea e tau ai e le isi vaega, ae o le tauga lea o lea e tau ai e le toatele o tagata o le atunuu. O lea la ua ou faaaogaina e au ia, e faigofie ai ona... na ou faapea ai o e silafia. A o lea e leai...

FOFOGA FETALAI: Ia se i tulai mai lau Afioga i le Minisita.

Tofa Hon Olo Fiti Afoa Vaai: Lau Afioga i le Fofoga Fetalai, ou te le iloa la po o ai le faleoloa ua taua le mea lea o le fatafata mamoe o le pau mamoe. A faapea la o lea e silafia e le Sui Taitai o le Itu Agai, se i ou fesili atu lava la i lau Afioga. E manaia le pau mamoe i le tausami? A faapea o lena e manaia lava...

Tofa Hon Lauofo Fonotoe Nuafesili Pierre Lauofo: Ou te le iloa po o le a le isi tali, o lea na e faafofoga i le saunoaga a le sui usufono lea e saunoa, o lea foi sa fai le latou faatauga o tulaga o le latou ekalesia, lea foi sa fai matou faatauga. Sa faatau lava, e pei o le mea taugofie lea, o le taumafa taugofie lea, ua ou te i foi au ia, ia se i aumaia e faataitai pe faapei. A o lea e sao le saunoaga a le sui usufono lea e saunoa, o le matua tele lava i mea o le pau, o le gao.

FOFOGA FETALAI: Se i ou fesili atu lava i lau Afioga i le Sui Taitai, o le a la le faapalagi o le pau mamoe?

Tofa Hon Lauofo Fonotoe Nuafesili Pierre Lauofo: O le tauga lea e aumai i i, o le lamb rack, e pei o tulaga na.

Tofa Hon Olo Fiti Afoa Vaai: Lau Afioga o lea la ua manino, o lana ia lava lea faa-Samoa, a o le lamb rack lea e aumai i i, o le fatafata mamoe.

FOFOGA FETALAI: E i ai le manatu o le Nofoa, o le a taatia ia le fatafata mamoe ma le pau mamoe, o le a toso ai le tatou... se i saunoa mai le Afioga i le Minisita.

Susuga Hon Laauli Leuatea Polataivao Fosi: Lau Afioga, e le tuumamaina le mea lea lau afioga. E leaga sa matau analeila, o le upu lea pau, tulou lava...e talu lava ona tatou omai, e le i i ai se mea lea na tatou taumamafa ai o se pau o se mamoe. Ae o lea faatoa malamalama nei, e sese le faa-Samoa ina e le Sui Taitai o le upu, o le fatafata mamoe, ae le o se pau mamoe. O ai e mafai ona taumafa se pau mamoe? O le ala lea, leaga o la e faafofoga le atunuu, ne i te i ua faapea ua lau mai e le Faigamalo ni mea faaletonu e taumamafa ai le atunuu. E le o le pau la o le fatafata mamoe.

FOFOGA FETALAI: Ia faafetai o lea ua manino.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, a silasila i pepa ia e aumai o searches, o lea e aumai ai mutton flap, o le mutton flap la, o le mea lena e tau o le fatafata mamoe. E ese le mutton flap ese le lamb rack.

Tofa Hon Olo Fiti Afoa Vaai: Lau Afioga o lea e taumafai lava le Sui Taitai e faasese, o le flap o le oo, ao le rack o le fatafata. Ua e maua mai le mea lea e fai atu ai?

Tofa Hon Lauofo Fonotoe Nuafesili Pierre Lauofo: O le mutton flap, o mea ia e i ai ia auivi tulou le faafofoga. A o le lamb rack, e i tua i i, lea e i ai le pau mamoe.

FOFOGA FETALAI: Ua i ai le manatu o le Nofoa ua faagata i i le talanoaina o ia mea. O lea ua manino, e sao o lea ua saunoa le Minisita o Faatoaga, leaga o lea sa taua le...vaeatu lava le Palemene ma le faafofoga mai o le atunuu, o le pau. O le measili o lea ua manino le atunuu, e le o i ai se tulaga faapena, i te i ua faaseseina ai le faafofoga mai o le atunuu. E i ai le manatu o lea ua manino lea itu.

Lau Afioga i le Sui Palemia pe i ai se mea e...pe ua faamalieina lou finagalo?

Afioga Hon Tuala Tevaga Iosefo Ponifasio: E faafetai i lau Afioga i le Fofoga Fetalai, e leai o lea ua ou maua, sa ou tau tulai atu e tau faapupula teisi le mea lea ua taua o le pau mamoe. Lau Afioga, e leai se mea faapena i lalo o le tatou Tulafono po o aiaiga foi o lo o i ai nei. O le fatafata mamoe i lona faa-Peretania o le breast, o le fatafata. O le lamb rack o totonu o le fatafata i le mea o lea o lo o i ai le ivi se i tulou, o lo o pipii ai foi isi vaega o ribs. O i ina la e ese le manaia o mea na i le taumafa. Lau Afioga i le Sui Taitai, e sese lau faauigaina o le pau mamoe, o le lamb rack e le o le pau lena faamolemole.

FOFOGA FETALAI: O lea ua manino ua atili ai le manino o lenei mataupu, ua aoga foi le felafolafoai o lea ua manino ai lea tulaga. E i ai le manatu, faaauau mai le saunoaga a le sui usufono mamalu.

Tofa Hon FAIMALOTOA KIKA IEMAIMA STOWERS-AH KAU: Ia faafetai ua uma foi le faamatalaga, ae faamalulu atu, o le a se faamatalaga ua fai atu, ona o mea ia sa ou faalogo o talanoa ai le vaega o lo o faaigoaina. Ae o le a tatou see ese ma ia mea.

Ou te tatalo atu lava i lau Afioga i le Minisita o le Soifua Maloloina, ma outou afioga i Minisita o lo o vaaia ia oloa ia e oka mai e kamupani, se i tuu ia se Tulafono e faasa ai ona toe aumaia ia mea. Aua e pei e sao ai le saunoaga a se tasi o sui usufono, e seasea o tatou vaaia. E le faaaogaina e atunuu e maua ai mea ia, ae pei o lea e uunai mai ia i tatou ina ia faatau ma maua atu ai tupe o mea ia, ae le iloa po o mea ia o lo o fafaga ai nisi, tulaga foi nei tatou te le fia taua, a? Ae o le tatalo lena a lenei itumalo, o lea ua maea atu se faamatalaga. Ae lagolagoina le faatulai mai e le Afioga i le Minisita ma lana Matagaluega, ae tuutiitia tiute mo mea o lo o manaomia i aso uma, ae matua sii i luga ia vaega ia, ma le tele o le tatou mamai, ma sefe ai foi a tatou seleni. Faafetai.

FOFOGA FETALAI: Malo saunoa, faafetai. E talitonu ua manino. O lea e matau atu o lea ua fou mai le sa o le sui usufono mo Aana Alofi 2.

Afioga AIONO TILE GAFA (Aana Alofi 2): Faafetai i lau Afioga i le Fofoga Fetalai mo le avanoa ua maua e lenei usugafono. E faatalofa atu foi ma le agaga faaaloalo i le papaaao o le paia o le Maota, lau Afioga i le Fofoga Fetalai, faapea foi le la talaga i le afio o le Taitai o le Malo, afioga i le Tamaitai Palemia, aemaise foi le Sui Palemia ma le mamalu o le Kapeneta faapea foi Minisita Lagolago, faapea foi lenei talaga i le susu atu o le Sui Taitai ma sui usufono o le Palemene, aemaise foi o le paia maualuga i Ofisa Sili o Matagaluega aemaise foi o le atunuu tapuai ua tatou mafuta i lenei afiafi. O le viiga lava o le Atua e faasilisili i mea uma, ua sola le taeao ma le malamalama, ae o lea ua tatou taunuu mai i lenei afiafi i Lona agalelei i le soifua manuia ma le malosi. O lea foi ua tele upu i manu, ae itiiti upu i mala. Ma le faaaloalo lau Afioga, o le a taoto ia paia ma sa o Samoa, ua taoto a alao lava, e le toe tele i ai se upu ma se faamatalaga ona o Samoa o le atunuu tofi. Ae fia fai se manatu, e puupuu lava se lagona, e tusa ai ma le Tulafono ua talanoaina nei i le Laulau a Fono a le Palemene, aua le toe fetuunaiga o tiute o le tau o oloa aemaise lava taumafa.

E tele finagalo i le tulaga o taumafa ia e pei ona taumafai e tuutuu i luga tiute ona o le faaeteetega ma le puipuiga o le soifua manuia ma le soifua maloloina o lo tatou atunuu. E moni lava, e sao lelei lea faamatalaga, o lea finagalo i le faafoeina ma le taumafaiga e faataoto le tulaga ina ia fetuunai ai tiute mo le tau faaitiitia o le tuuina mai o taumafa ia.

A tatou vaavaai i le olaga lea ua tatou soifua ma ola ai lau Afioga i le Fofoga Fetalai, ua masani lo tatou atunuu, ua masani Samoa i le gasologa maiga o le olaga ma le tulaga e ola ai. E faafetai o lea ua saunoa le Minisita o Faatoaga i nisi o atinae, aua le taumafaiga mo fofoga taumafa o le atunuu. Ae o le Samoa lava ia, o le a lava le mea e fia taumafa ai, e taumafai lava ia maua. A alu le vaiaso e le i taumafaina se vaemoa, ioe, e taumafai lava. Na faalogo foi i le tala lea ina ua umi o sioki le vaemoa, tulou. Sa fesili lava po o afea, e taunuu mai ai, ua faapena ona maua mai, e pei ua fiafia foi. Pe lua lava pe tolu vaemoa, e matuai tofu le aiga i le faiga e fai ai. Ae manatua le isi taimi lau afioga i le Fofoga Fetalai, na matua tapunia lava ma faasa le siusiupipi. Ae o le a le mea na tupu? Na fai pemitā e o ai i Tutuila e aumai siusiupipi. O le agaga lena, o tatou a oo ina manao le loto e o lava e aumai. E le gata o le aumaiga e fai ai faalavelave, ae o le pito sili lava o lea taumafa lea na aumai ai i lena vaitaimi. A o lea ua i ai le finagalo, ina ia fetuunai ia tiute o taumafa ia ina ia mafai ai ona faigata ona faatau e tagata pe a. Ioe, a silasila i faleaiga ia ma pisinisi ia e faatau taumafa i le taulaga, e le asa lava se faleaiga ma taumafa ia o mamoe, o siusiupipi, mea

lololo uma lava. E a, e faatau lava e tagata, e faatau lava ma taumamafa ai le atunuu.

E pei o le tulaga lena e manatu ai, o lena e i ina le tofa i lau Afioga i le Minisita, faafetai mo le faatulaiina mai o lenei Tulafono, ae fua foi i le tatou vaai i le atunuu. O le a le mea e finagalo i ai, ou te iloa e pei lava o le upu lea e lagona, e palasi lava i tauau o le atunuu tulou, le faafofoga mai a Samoa, i tulaga o tatou galuega ma taumafai e saili se manuia o lo tatou atunuu. O le tulaga foi lea e pei ona tau i ai le atugaluga o le Afioga i le Minisita o le Soifua Maloloina, tulou lau afioga i le Minisita, malo faafetai. I le tulaga lava lea o le faaauau pea ma taumafai pea e faamanatu i le atunuu, ia le puipuiga o faamai le pipisi, a o le mea lea e maua. E a le soifua maloloina ma isi vaega e faaitiitia faamai ia, e taumafai i se tulaga ina ia sefe ai le soifua maloloina o le atunuu mai ia mea, e le mafai lava lo tatou atunuu, e le mafai lava. E o lava e saili taumafa ia. E pei ona malie i saunoaga, a le maua sina mea e tafetafe mai ai le gao e le tau lelei le faalogo. E pei o le tulaga lena e avatu ai se tuualalo, se fautuaga. E momoli atu le faafetai i le Tulafono, ae tatou te silasila foi, o nei lava mea uma e pei ona talanoa atu ma le faaaloalo, e fai lava mea uma aua Samoa, aua le atunuu la e tapuai mai i o tatou faiva ma a tatou feau, e pei ona tofofi ai i tatou mo se manuia o lo tatou atunuu. E pei o le agaga lena e fesoasoani atu foi se manatu o lenei itumalo aua lenei Tulafono. E talosia i le Atua ia sao ma uli le tatou agai atu i nai toe aso o lenei tausaga, fai ai se meaaloa mo Samoa i tatou taumafaiga aua le fofoga taumafa o le atunuu.

Ia manuia lau Afioga i le Fofoga Fetalai, tuli I luma so tatou ai maua pea lou soifua laulelei aua le taitaiga o le Fonousu a Samoa. Manuia foi le Tamaitai Palemia ma le la talaga i le Kapeneta ma Minisita Lagolago, manuia foi lenei talaga. Manuia foi le tapuaiga a Aana Alofi 2, tatou agai atu i le Kirisimasi, e ui foi ina lagia lo tatou nuu, e pei lava o upu masani, e leai lava so tatou loto e fai, e pule le Atua i lona finagalo fai toatasi, aua se tasi o tama, te iloa o le Aso Toonai, ua maua e avatu ai i tua le tofa ia Taelefusi, ia faamafanafana i le tina ma le fanau, aemaise le aiga, le afioga ia Letagaloa Pita ma le aiga aua se tasi o tama o le aiga. Ia manuia le Kerisimasi manuia foi le Tausaga Fou.

FOFOGA FETALAI: Ia malo faafetai i lau afioga i le sui usufono mamalu o Aana Alofi 2. O lea e matau atu ua fou mai le sa o le sui usufono mo Sagaga 2.

Susuga MAULOLO TAVITA AMOSA (Sagaga 2): Faafetai mo le avanoa i lau Afioga i le Fofoga Fetalai. Ua maea foi ona paepaeulufanua ia sa ma faiga o le Maota nei, aemaise foi o le tapuaiga ma le faafofoga mai a lo tatou atunuu. E faafetai tele i le Minisita e fitoitonu i ai lenei mataupu, i la outou galuega sa outou fitaituga ai i le Matagaluega.

E tolu lava nai mea ia ou te fia talanoa atu i ai. E manaia lava le fetuunaiga o mea ia o le faapau i lalo o le vaega lea o tiute o fualaau faisua ia e le o maua i Samoa, o mea ia o cauliflower o broccoli ma mea faapena. Ae o le tau popolega leaga o le nuu lenei o Malie o Afega ma Tuanai, o isi ia malosiaga o latou o le kapisi. A pau tele la i lalo le tiute o le kapisi lea mai fafo, o le a faigata le competition, o lona uiga e tauau ina le toe taulia ia ia foi alagaoa o lo o faalagolago i ai lo matou itumalo, sei toe silasila ane i ai.

Ou te ioe ma amene i le saunoaga a le Minisita o Faatoaga, ae atonu e le o toe mamao se taimi ona lelei lea o tatou atinae, ona uma lava lea o le tatou vevesi ma faalagolago i nei taumafa mai fafo. Ae ina ua tatou malolo analeila, valaau mai lea o le isi tamalii o lou itumalo. Atonu o se avanoa lenei e silafia e lau Afioga i le Minisita, e i ai le toa lea e i ai i le SAFPROM, ua uma ona ok atu lana pa puua, a o le mea ua tupu, ua manaomia e le PUMA le avatu o se environment impact assessment. A fesili la i consultants, e uma ane le pili ua tutusa lava ma le tupe lea e aumai e faaoga i ai, pe mafai lava ona toe silasila ane i tulaga ia, ina ia vave faagaoioi ia poloketi faapea.

O nai mea ia ua ou vaai atu ua pei ua vaelua, ua split ia....

FOFOGA FETALAI: Malie le sui usufono mamalu, se i tuu atu le avanoa i le Afioga i le Minisita. Ia manatua o le Tulafono lea tatou te talanoa i ai, o le Tulafono o le Tiute.

Susuga Hon Laauli Leuatea Polataivao Fosi: O le ala lea o lou tulai atu ona o lea ua agiga i le Maota faafofoga mai foi le atunuu. Ae le tatau ona faaselemutu ai faapea, fai i si toeaina e alu atu ma te feiloai, ona faigofie lea o lana mataupu leaga e le aafia le SAFPROM i tiute ia tatou te talanoa ai. Ae fai i le toeaina e alu atu i lou ofisa.

FOFOGA FETALAI: Ia vaai lea i le puupuu ma le manaia o le avanoa.

Susuga MAULOLO TAVITA AMOSA: E faafetai i lau Afioga, e le tau selu atu, a o Minisita faapea e tali manao, ona o lea sa saunoa ma taua le project lea analeila, lea foi ua ou faapea, o le avanoa loa lea, o lea la e te faafofoga mai oe le tamalii lea na valaau mai, o lea ua tatala atu le avanoa i le Afioga i le Minisita faafetai lava.

O le tulaga lea ua split ai ia le lafoga lea e faaulufale mai ai oloa, ua ave le isi vaega i excise tax, ona pei lea e foliga o lea e tumau pasene, ae a fai le calculation ua sii lava i luga le tupe e faaalu i ai, ona o lea sa ou fesili ananafi, e eseese taimi ia e calculate ai le excise tax ma le isi vaega lea. E na o na faataatia atu i tafatafa. O le a ou le toe taua pau mamoe o lea ua tapu mai e lau afioga. Ae ua laga lou manatu, silasila ane lava i le 0206

Edible Offal of Bovine Animals, o lena e sau ai le igoa i ina o horses, solofanua, asini, miula, se i tulou le Maota. I alualu uma le pau mamoe tulou, ae sau o mea faapea. O le mea la lea e i ai, i te i ua faapea, ai e le o faitaua a tatou pepa.

FOFOGA FETALAI: Se i ou fesili atu lava i le sui usufono, o le a le pepa lena e te uua maia na e tau mai.

Susuga MAULOLO TAVITA AMOSA: O le pepa lea, lea sa tufa mai ananafi, vaai i le code lena 0206 Edible Offal of Bovine Animals, na e bold atu le tusiga, lena e sau ai le swine, sheep, coat, horses, asses mules ma sau ai lava faapena. E lelei lava le aumai, pe se mea na cut and paste mai i le aumaiga i totonu i i, ae lelei lava le fesili atu, ma le faaaloalo, tulou le mamalu o le Fonotaga, leaga o mea o lea e aumai i i.

FOFOGA FETALAI: E pau lava le mea o le faitauga faalua o tatou Tulafono, o lauga faalauaitele ae le o le auiliili mai o mea taitasi.

Susuga MAULOLO TAVITA AMOSA: Ioe, ia lelei faafetai, o lea ua ou lauga faalauaitele atu i le subtitle lea, ia silasila i ai, aua ne i toe aumaia ia mea faamolemole mo le agai i luma.

Lau Afioga i le Fofoga Fetalai, o nisi mea ou te iloa ua taea uma foi e nisi o sui usufono, ae faafetai mo lenei Tulafono Tau Faaofi. Ia manuia le Kirisimasi ma aso fiafia foi i le faaiuga o lenei tausaga, aemaise foi lau Afioga i le Fofoga Fetalai.

Ne i galo ia te au, faafetai i lau Afioga i le Minisita o le Soifua Maloloina, aemaise o le Palemia ma le Kapeneta, i se avanoa foi sa ou saili ai se taulasea, saili matagi ai i fafo. O lea ua outou silasila mai, e pei ua ou le toe faaogaina mea ia o mutton flaps lea pei ua ou pae ea, e pei sa manaia lou lapoa ma ou aulelei i le tama lena, anyway o le avanoa lea faafetai tele i le Malo i le avanoa sa saili matagi atu ai i fafo. Ia manuia le tatou Fono.

FOFOGA FETALAI: Malo saunoa. O lea e matau atu ua fou mai le sui usufono Tamaitai mai Aleipata Itupa i Lalo.

Afioga FAAGASEALII SAPOA FEAGIAI (Sui Usufono Tamaitai – Aleipata Itupa i Lalo): E faafetai i lau Afioga i le Fofoga Fetalai mo le avanoa. E muamua foi ona faatalofa atu i le Tamaitai Palemia, Sui Palemia ma le mamalu o le Kapeneta faapea foi lenei Itu ole Malu, i le afio o le Sui Taitai faapea sui usufono o lenei Itu, tainane foi Ofisa Sili o Pulega o Matagaluega taitasi. E puupuu lava se manatu ona o lea e faalogologo atu, ua ta tasi lava manatu i mea lololo, o le mamoe lololo. Ae mo le silafia, o taumafa uma o lo o taua i i, e maua uma ai lava faamai i taumafa nei, e pei

o le falaomata, o le masima, o le suka, o meaai uma na e maua ai le faamai. E pei foi ona tatou silafia le faamai lea ua taatele o le tino puta i tatou fanau, e mafua mai i mea suamalie, e pei ona malie ai le saunoaga a se tasi o sui usufono i le taimi ua fano, e taua le lava o aoaoga, tataua ona fai foi se Tulafono ia taofia ai le faaulaina o fanau i taimi o laugatogi i le ula lole. Ona o mea ia e fiafia ai tamaiti a o le mea lena lea ua tele ona tupu ai faamai i tatou fanau, o le tino puta ma maua ai foi fanau i le mai suka laitiiti ona o le taumafa lava nei e pei ona auina mai, pe tuu a la i luga le lafoga pe tuu i lalo, e le mafai a la ona taofia o tatou tagata, e tataua a ona o faatau mai ona o mea o lo o manaomia e tausii ai tatou tino ae le tele se manatu ona ua pau lena o se manatu vaivai o lenei itu. Ia manuia le tatou fono.

FOFOGA FETALAI: Ia o lea ua matau atu o loo fou mai le sa o lau Susuga i le Tiakono Toeaina mai Gagaemauga 2.

Tofa SEUAMULI FASI TOMA (Gagaemauga 2): Faafetai i lau Afioga i le Fofoga Fetalai mo le avanoa. E faatalofa atu foi i le paia o lenei Maota, Taitai o le Malo aemaise foi le Aiga Kapeneta, aemaise foi o sui usufono mamalu o le Palemene, Ofisa Sili o Pulega o Matagaluega aemaise lau Susuga i le Failautusi ma le paia o le Ofisa o le Fono Aoao Faitulafono.

Aemaise foi o le tapuaiga a Samoa o lo o seu silasila mai i maota ma laoa aemaise foi o atunuu mamao i lo outou lagi soifua ma le lagi e mama malo le pale.

E tulai atu ma le faaaloalo e fai foi se motugaafa a lenei foi sui usufono ia e tusa ai foi ma le Tulafono ua taoto nei i luma o le Palemene, o le agaga faafetai i lau Afioga i le Minisita e tusa ai ma lenei Tulafono ua tafafao foi taliga o tufugauli ma maua nisi foi o lipoti o le Matagaluega o Leoleo ma Falepuipui e faaitiitia solitulafono i lenei foi vaitaimi o aso fiafia e mafua mai ona o tulaga o le ava malosii. O le mea lea e momoli atu ai le agaga faafetai lau Afioga i le tofa i lea foi vaega o le Komiti Faatonu o le ava malosii ma le tapu o le ava malosii ia ua tele ona aafia ai alo ma fanau o le tatou atunuu.

O le tulaga i le Tulafono lenei ia e pei ona maua i saunoaga a nisi o afioga i Minisita, ia ua tatou vavao lava i le taugata o le soifuaga aemaise foi o le lololo o taumafa e tupu ai le gasegase. O le molimau a se tasi o fomai i le tulaga lea, e le mai ai se isi i se taumafa lololo, e le mai ai se isi i se meaai lololo ae mai le tagata i le meaai anogase. Ia ua tuumalo le fomai lena ae o le tulaga o lenei afiafi ma le tulai atu o lea ua tagatasi lava saunoaga. Ae ou te maitau lava i aso ia sa i ai le Komiti foi lele latou te faatulagaina le tau o oloa, tau o oloa ia e masani ona avatu ma tufatufa atu i le faleoloa ma pisinisi i tua. I lo'u la ia talitonuga aua e leai se itu lelei e tatou te vavao ai i

le tiute ua pau ma le sii ae le pule lava le faleoloa i tua i le tau o lana oloa. Ae pe le alagatatau ona silasila lau afioga i le Minista ma le paia o le Matagaluega i se Komiti latou te mataituina le tau talafeagai o oloa ina ia laugatasia uma ai le atunuu i le tau o le oloa ia ona faaaoga lea o tatou sui foi ia o Fono Faavae, latou te silasila totoa i le asiasia o faleoloa ia poo le tau ia o oloa ia pe afai o le tulaga lea o le tauagata. A o le mea moni lava ia e pei ona matou talanoa atu, ia o le taua ia o le soifuaga e le toe mafai ona toe solomuli. Ae pei e pau lea o se taofi o lenei itumalo e uiga i le vaega lea ma si vala lea, pe le alagatatau ona toe silasila ma mataitu e tatau lava ona i ai se Komiti latou te toe vaaia lea tulaga ma le tau o oloa ina ia laugatasia, ma se Tulafono ina ia laugatasia e oo lava i mea o laptops ma telefoni ia e tatau ona i ai i le Tulafono lea ina ia laugatasia ai le tau aua foi le faatau o le atunuu.

E pei o lo'u lea talitonuga, ae o le tulaga lava ia lea na tatou mafatia e faatau o le asosi i mea e le oo i ai le malosi. I lenei vaitau ma le tilotilo i le mealofa a le Atua i le atunuu, tele le fuata, a leai lava se mealelei ia la e tele le popo e valu le miti ma tatau i ai le eleni, taumafa ai ma le fiafia e leai a se mea o le a ala ai fua ona tatou oi ae o le tatou asosi i le mea e le oo i ai le malosi, ia o le fiu e totogi loan.

Ia e pei o se sao lea o lenei itumalo vae atu o le paia o lenei Maota a o faafogafoga mai foi si o'u itumalo, ia mo le faamamaavega a le itumalo lenei a i ai lava se itumalo 51, le itumalo lenei... mea a lea e tau o le faamamaavega lea ua ou talanoa atu i mea a ia tau maliu, e le tigaina e faatau nisi oloa, e maua lava le taumafataga. O le mea taua lea. Ia manuia le Fonousu a Samoa, manuia le tapuaiga a si o'u itumalo, ae matou ola i le alofa o le Atua. Faafetai.

FOFOGA FETALAI: Malo faafetai mo le sao foi o le sui mamalu ia tulai mai le sui mamalu mai Vaisifano Nu 1

Afioga NIUAVA ETI L MALOLO: Faafetai lava i lau afioga i le Fofoga Fetalai i le avanoa foi ua faapea ona tuuina mai se i fai ai foi se sao o lenei itumalo o Vaisigano Nu 1, e tusa ai foi o le Tulafono Tau Faaofi e pei ona luma o le Maota Fono.

E faatalofa aloaia lau Afioga i le Fofoga Fetalai i lau Afioga i le Tamaitai Palemia ma le Kapeneta, Minisita Lagolago.

E faatalofa foi i lau afioga i le Sui Fofoga Fetalai, o le Sui Taitai o le Itu Agai ma lena foi Itu o le Palemene Samoa ua potopoto aemaise foi i afioga i Ofisa Sili o Matagaluega ua tatou tapisa i lenei afiafi ia ona o le tulaga o le fesuiaiga o tariffs, lea e pei ona tatou talanoa ai, lea e afua mai ai ona o le tulaga o taumafa. A silasila i ai e pei foi ona sausaunoa nisi o sui usufono mamalu ia ma faatusatusa foi i le agai i luga ma le agai i lalo, ma

le aafiaga foi o le tulaga o tupe maua, aemaise foi o le soifua maloloina o le mamalu o le atunuu o loo taumamafa i nei taumafa.

Ae agai se lagona o lenei itumalo e afua i tulaga foi ia o lo o i ai faamai pipisi lea sa talanoaina, ma faamai le pipisi tauave, o se lagona i lenei foi vaitau, ua maua foi i faamatalaga le agai i luga o le rate o le tulaga lea o le diabetes poo le mai suka ia aemaise ai foi o le toto maualuga. E pei o le agaga e tau momoli mai i tuumumusu mai o le vaega lea e pei e agai i le tausiga o tagata ia. O le mea e agai i totonu e tausi ai le tino e pei o i ina lea e tau afua ai nai vaega ia, ae i ai lo'u talitonuga o le fesuiaiga o le tariffs lea i luga o taumafa e afua ai faamai le pipisi, ona manatu lea o le sui usufono lenei o le itumalo o Vaisigano Nu.1 ailoga o le fofu lea o le tulaga lea. A tatou silasila lelei i luga o TV, i le Matagaluega o le Soifua Maloloina, o le anoanoai ia o Polokalame o loo faapea ona faasalalauina. A silasila foi i nuu ma afioga, ua leai lava se nuu e toe agai atu i ai, e le o fai ni mea foi ia o zumba. A silasila la i ai i le trend lea e te talanoa i ai mai tausaga ua agai i tua i le amataga mai o le soifuaga, a o tatou laiti foi e compare i le taimi lenei i le rate o le agai i luga e afua mai lava ona o taumafa nei. O lona uiga la i le faamatalaga, e le o le fesuiaiga o le tariffs lea le fofu o le faafitauli ae manatu le lagona o lenei itumalo i le tulaga lea i lou lava ia, silasila ia te oe ma lou soifua maloloina. A fua foi i ai i le tele o le tamaoiga o lo o faapea ona auina mai atunuu i fafo mai tatou overseas donor e agai tonu lava i le vaega lea o le tausiga o le soifua maloloina o lona uiga e le o mama i le silasila mai a atunuu i fafo le tulaga o lo o i ai le agai pea i luga lea o faamai ia ua tele ona aafia ai le atunuu, e tai pei o le mai suka e fou foi le lagona sa tatou polepole i na vaitau faapea le faamai oti o le AIDS, ai o le faamai vave lea.

A tatou silasila ma faatepa lau Afioga i le Fofoga Fetalai ma le paia foi o le Maota, ia aemaise foi o le faafofoga mai o si o tatou atunuu, o faamai nei e lua ua televave tele le agai i luga o le kanesa ma le mai suka. O lona uiga e mafua mai ona o taumafa ia ae leai se isi e alu atu faapea ia te oe taumafa le mea lenei, taumafa le mea aua le fai, taumafa i le mea lea faapei e i ai le fuaitau foi lea o mea e alu i totonu o mea ia e aafia ai le tino o le tagata. E leai lava se isi e alu atu fosi le taumafa a le isi tagata o lona uiga i le lagona foi lea o loo i ou aao lava lou soifua maloloina pe a fua foi i le afioga i le Minisita o le Soifua Maloloina. Ia tasi nei o Matagaluega e pei foi ona fai atu e taua tele le latou faasalalauaga, po uma lava e le mafai ona misii le tulaga lea i le aumai, toaga e savali ia o i zumba.

A tatou silasila foi i le tatou Matagaluega lea ua faamatuu atu nisi o tupe i nuu i tua i Komiti e faatino ai le vaega ina ia faapea ona tausia pea le soifua maloloina. O lona uiga la i le tulaga foi lea o le agai luma ma le agai i lalo o aafiaga o tagata mai faamai, e i ai lo'u talitonuga e mafua ona o le tulaga lea, lea e polepole tatou i le fesuiaiga lea o tariffs lea ae manatu e le o le fofu lea.

E manatu o se fesoasoani lea a lenei itumalo ae manatu o le tele lava o sulu o le tele foi lea o figota lau afioga i le Fofoga Fetalai, ina ia faapea ona taoto lelei le vaafolau o le tatou atunuu aua le soifua maloloina. Ae i ai foi le lagona ia tausolomua foi ia tatou o Taitai o le atunuu ia ona faataitai le vaega ia o le faatinoga e pei ona faataitai ai le atunuu. Ia e manaia le tino o afioga i le Minisita aemaise foi le paia o lenei Palemene e ala mai i le taumafa.

Ia lau Afioga i le Fofoga Fetalai vaeane foi le tapuaiga a si o’u itumalo, ia masalo se taimi maua foi se avanoa e oo atu se faamanuiaga o le Kerisimasi ia ae manuia tele le Fonousu a Samoa manuia Samoa faafofoga. Faafetai.

FOFOGA FETALAI: Malo faafetai malo le saunoa i le sui usufono mamalu. Ia, o lea e maitau atu lea ua fou mai le sa o le afioga i le sui usufono mamalu mai Sagaga Nu 1.

Afioga Hon LOAU SOLAMALEMALO KENETI SIO: Faafetai lava i lau afioga i le Fofoga Fetalai ua maua foi se avanoa e avatu ai se motugaafa e tusa ai foi ma le Tulafono o loo talanoaina nei.

Ia, e manatu o sa ma paia ma faiga o le Maota nei ua uma ona paelago e nisi o tulatoa ua mavae atu mai lava i le taeao sei paia lenei itula o le afiafi.

E tulai atu i le ava tele ma le faaaloalo e molimoli foi se sao o lenei itumalo e tusa ai foi ma le Tulafonon ma teuteuga e pei ona tatou maitauina i lenei itula o le afiafi.

Lau afioga i le Fofoga Fetalai e le fou lenei tulaga e tulai mai i lea taimi ma lea taimi i lea tausaga ma lea tausaga i ni fetuunaiga aemaise ai lava le Ofisa o le Tiute o lena ua faapena ona maitauina foi i Tulafono e pei ona tuuina mai i le Afioga i le Minisita.

Ia ole agaga o le tulai atu lau afioga ona o le faaupuga e faaupuina ai ina ia logomalie i le faafofogaaga a le tatou atunuu o le Tulafono ma ona aiaiga aua le maitau mai o le tatou atunuu lea foi ua maitau i saunoaga a nisi o sui o le Maota nei, ia e lagolago i le faamoemoe e pei ona i ai le siitiaga foi o meataumafa e sii i luga isi vaega, ae pau isi vaega o le fetuunaiga ina ia faapena ona taoto ai i agatonu ae o le Ofisa Tiute ma tatou tupe maua o i le auga o le tatou faamoemoe o le tatou atunuu o faapena ona maua ai le tamaoaiga e fuafua i ai i lea tausaga ma lea tausaga. Faafetai atu i lau Afioga i le Minisita i se tofa foi ua a’e ua faapena ona silasila totoa i ai le Matagaluega aemaise lau afioga e fetuunai tau o oloa ia ina ia maua se tatou tupe.

O le uiga la o la’u faamatalaga lau afioga ona e pei e foliga mai e tatou te alofaga i le tulaga foi lea ona tuuaia lea o... ia po o faamai le pipisi ia i le faalogologo mai o le tatou atunuu pei ua faafagogotagiao lo latou faalogo i lenei tausaga e le fou taimi foi a o tulai mai ma matou tulai mai. Ia o le tala

lava lea i le fetuunaiga o tiute o tau o oloa ina ia faaitiitia faamai le pipisi, suka, toto maualuga, tino puta ia ae pei foi ona saunoa nisi o sui usufono e pei ona mavae atu, ioe, e le foia ai le faafitauli lea e ala i le faamai le pipisi. E pei ona tulai mai ae o le tautino o le solo a le tamaloa lau afioga i le Fofoga Fetalai ia e taumafai ina ia maua se fesoasoani i le tamaoaiga o le tatou atunuu. Ou te iloa o le a malamalamagofie le atunuu i le latou faalogologo mai aua le Tulafono e pei ona Tau Faaofi e pei ona i ai le taumafaiga a le afioga i le Minisita. O la'u faamatalaga lau afioga, a tuusao le auga o le faamoemoe e ala ai ona faatino le Tulafono ina ia maua ni a tatou tupe faasili mai meataumafa, e talitonu o le a faapena ona onosaia e lo tatou atunuu ma ia atinae e atinae ai le tatou atunuu. E le o se mea leaga o le mea lea ou te lagolagoina ai le Tulafono, a o faamai le pipisi ma tulaga e pei ona taumafai mai ai le afioga i le Minisita o le Soifua Maloloina ia ua gasea le Minisita ae le fou e le fou ia tatou le mea lenei. O taimi foi a o matou i ai, o le tulaga lava lea e taumafai ina ia fai i se faaupuga logogofie i le tatou atunuu a o le auga o le faamoemoe e maua nai a tatou tupe faasili ia aua le taumafaiga o si o tatou atunuu. Ia manuia lau afioga i le Minisita ma le Tulafono. Manuia foi le Fonousu a Samoa. Soifua.

FOFOGA FETALAI: Malo faafetai. Ia e le taumate o lea ua fou mai le sa o Vaimauga 2, le sui usufono mamalu.

Tofa LENATAI VICTOR FAAFOI TAMAPUA (Vaimauga 2): Faamalo faafetai. Faafetai lau afioga i le Fofoga o le Maota e tusa ai foi mo le avanoa o lo'u nei sui usufono, e tuu atu ai foi se sao aua foi le tatou Tulafono e pei ona talanoaina i lenei afaifi. Ia e faamauina le agaga faafetai o lo'u nei sui usufono i le Afioga i le Minisita, po o le afioga foi i le Sui Palemia e tusa ai foi ma le Tulafono e pei ona folasia i luma o le Laulau-a-Fono a le tatou Palemene i lenei aso. Faamalo faafetai.

Faafetai foi i le faamanoina ma le faamatalaga e pei ona aumai aua auga o aute i lenei Tulafono ma ana teuteuga o lo o faapena ona i ai lau afioga i le Fofoga o le Maota.

Ia e manatu e le umi foi se faamatalaga tele o nisi vaega ua faapena ona faaleoina e nis o sui usufono, ae pau lava o lea, e fia avatu foi se molimau i le tulaga lea ma le faaleoina foi o le lagolagoina o nei Tulafono ona sa i ai foi se tasi o tama o lenei aiga, ia o le toeaina e fiafia tele i le mealololo po o le a le tau, e fai mai lava le toeaina e fia ai ai. Ae pau lava le lave o le toeaina lea e ma'i suka, e toto maualuga, ia e gugu foi ma le toeaina, a o le tala a le toeaina ia te a'u pe a fai nei toonai a lo matou aiga e faapea mai, 'Lenatai, e te le iloa le manaia o le mamoe po o le fasipovi masima po o le fasipuaa pe a e le aia le mealololo.' Ia e pei o le tala lea a le toeaina na fai mai a o le isi foi tala a le toeaina e fai mai o le aoga foi lea o fualaaui pei ua faamoemoe le toeaina i fualaaui. Ia a uma loa ona tausami le toeaina inu loa

lea o le fualaaui ona see lea i le tulimanu o le fale ona fai ai lea o lana sauniga lena o le oi i le tiga o ona ponaivi.

Lau afioga i le Fofoga Fetalai, e tasi lava se vaega e fia avatu ai se tuualalo lo'u nei sui usufono, o le lua vaiaso talu ai sa faapea mai ai si o'u toalua ia te a'u, 'Alu e vaai mai se mea e fai ai se tatou meaai i lenei afiafi, vaai se meaai e maua ai le soifua maloloina.' Ia lau afioga e pei ona silafia i lenei vaitau e pei o le moa a lea ua agai i ai le toatele, e sui a faiga a o le moa lava e faaoga i lenei vaitau ona o le tulaga foi lea e talafegai ma le tupe o lo o i ai i totonu o le taga. Sa ou agai atu i se tasi o supamakeki lau afioga i le Fofoga Fetalai, sa agai ma sa ou tilotilo ia ua ou le iloa po o le lamb rack po o le pa'u mamoe lea sa ou vaai, leai fetau lelei le tama lea ma se fualaaui faisua. O'u agai loa lea i le pito lea e i ai nai fualaaui faisua aemaise a fualaaui faisua e pei ona taua mai i totonu o le tatou Tulafono Teuteu e pei o fualaaui ia mai fafo e pei o le brocoil, cornflour ia ma nisi o vaega ia faapea o le a sui ai le ai i lenei afiafi. A o le mea ua tupu lau afioga, ou te tago atu, ia se i tulou, ua faatusa i la'u moto le brocoil lea ua ou uua, ou sau loa aumai i le tama ma lo'u manatu e le atoa se \$10 ae aumai le tau toetititi lava \$30 ae pau lea. Ia ona ou tilotilo loa lea i ai i le vaega lea ma ou faapea; a le 4 mea ia tai \$30 e le lava ai lo matou fale. O le a toe tuu toe teu faalelei. Ia o le iuga foi o se faamatalaga lau afioga, ona ou toe mimilo malie mai lea faatau le moa sau i le pito lea e i ai le falaoamata faatau ma le faalaoamata, sau i le isi pito faatau le fagugao, ia ona falai loa lea o le moa i le po lea. Ia ae pei o vaega ia e avatu ai se faamatalaga e toe iu lava i le meaai goa.

E pei o vaega ou te faafetai ai i le afioga i le Minisita ia aemaise foi le Matagaluega i le taumafai lea e fai se control i vaega ia e ese le taua aua o lo'u iloa i ai, e ese le price control e pei ona taua i nisi o sui usufono ia iloa ia e pei ona i ai e pei ona tatou alu ai pea i le tulaga lea o le competitive price.

Ia o le tuualalo i lau afioga ile Minista i lalo o fualaaui faisua e pei ona i ai ou te faamalulu atu i nisi o sui e faapea o lo o maualalo le lafoga o lo o i ai, a o la'u tatalo aveese lena lafoga ae tuu ua lava ma totoe le GST lena e fai ai le competition ia ma nai a tatou local suppliers i fualaaui faisua e pei o se tuualalo lea, aveese le 10% o lea e vaai atu ai o loo faapena ona i ai i luga o le vaega lea.

E fia faai se faamatalaga lau afioga i le matagofie o le saunoaga a le Minisita o Faatoaga ma Faiga Faiva, o le manaia foi ia o lana aumaia o le mafuaaga lea o le tatou Tulafono lea ina ia uunaia tatou local products ia pei o faiga o se lafu mamoe ma tulaga faapea. E mafua ona avatu se faamatalaga lau afioga ma ou lagolagoina le fautuaga, ona o le Aso Toonai na tea atu nei sa vili mai ai se tasi o uso nofo lava i Savaii e fai lana lafu mamoe ua valaaui fai mai o la ua momoli i lou fale le mamoe e fai ai le kerisimasi. Sa ou fesili i ai ou te le i faia a se mamoe muamua, ae fai mai e

tusa lava ma le size 2 se i tulou, sa ou agai atu loa ou fesili i lo'u afafine o fea le mamoe? Po o tuu i le aisa? Ae fai mai lo'u afafine o la e i totonu o le atigitaga o la e ola le mamoe. Ia ou sau loa ou tilotilo faatoa ou vaai a lea i se mamoe. Ia ua ou alofa lava i si mamoe ia ona ou faapea lea, o le a le tapeina oe nei e te pe i le po nei i se tulaga foi lea faalenatura. Sa taumafai ai loa e fai. O le uiga la e faapuupuu se faamatalaga pei ona aumai le faatusa a le Minisita o Faatoaga ma Faiga Faiva, o mamoe mai fafo e faapea le lololo, o le faatusa lea o lea sa aumai analeila, ae o mamoe o loo faapena ona faafailele ma tausii i Samoa nei, e sao lelei le afioga i le Minisita e leai ma se mealololo ua ou vaai ai i le mamoe lea ina ua faamama ae pau o lea, e le lava foi se aanoa pipii i ai i le mamoe lea. Ia lau afioga i le Fofoga Fetalai ia agalelei le Atua i tualumaga o totoe o le tatou fonotaga. Faafetai .

FOFOGA FETALAI: Malo faafetai, faafetai foi i le sui usufono mamalu i le faasoai mai o mea tutupu i totonu o lona aiga. Ia, lea foi ua faafogafoga ai lo tatou Maota, malo faafetai.

Ia o lea ua maea saunoa tatou sui usufono, ia o le avanoa lea lau afioga i le Minisita e te talifuaitau ai foi i nisi o mataupu na laga e sui usufono mamalu.

Afioga Hon TUALA TEVAGA IOSEFO PONIFASIO: Ia e momoli atu le agaga faafetai i lau afioga i le Fofoga Fetalai ona o lea foi ua toe maua le avanoa e toe tali atu ai pe tau faapulapula ai foi nisi o vaega e pei ona saunoa i ai le mamalu o le tatou maota i lenei aso. E maitau atu ua toetiiti lava tofua saunoa sui usufono o le Maota nei i lenei lava mataupu atonu o se mataupu taua ia po o se mataupu foi e aoga ona e i ai le talitonuga o lenei mataupu ua atagia mai saunoaga a le Maota lenei o loo momoli atu ai se feau taua i lo tatou atunuu e tusa ai foi ma le naunautaiga o le tatou Malo aemaise ai foi o le tatou Palemene ina ia faaititia lava le tulaga o faamai le pipisi. Ua nofo silafia le atunuu ua tele le aafiaga o lo tatou atunuu i faamai le pipisi, e tiga lava ona tele galuega ma faasalalaua ma aoaoga o lo o faapena ona auina atu i nuu tua e tualala atu i le Matagaluega o le Soifua Maloloina, ae o lo o faapena ona maitauina o lo o alu lava i luga le aafiaga o tatou tagata ona o le mafuaaga lava lenei, o le ga'o, o le suka, o le masima.

O lea la e momoli atu le agaga faafetai e tusa ai foi ma timaiga ia aemaise foi le fesoasoani mai i le tatou mataupu ua mau manatu ai foi. E tele lava o saunoaga pei sa lilifa lava i le tulaga foi lele o le taugata o le soifuaga ona o le tiute o le... Masalo e tatau ona avatu sina a'u faamatalaga i le vaega lea ona e i ai le manatu e le ole na o le tiute e mafua ai le taugata o le soifuaga. Silasila foi o le tele ia o aafiaga e tulai mai pe a tatou talanoa loa i le taugata o le soifuaga, e tele mea tatou te vaavaai i ai i le tulaga o le

aotelega o le tamaoaiga o le tatou atunuu. Tatou te le vaai itutasi i le tiute, tatou te vaavaai i fefaatauaiga o oloa ia e pei ona i ai foi le taua i Ukraine, ia male tau o le suauu ua faapena ona alu ai i luga le tau o le freight ia poo le tau o oloa ina ua aumai. Masalo o lena ua toe silafia uma lava mafuaaga ae o le tulaga ia o se aafiaga i le tau o le soifuaga i sa matou vaavaai i le tiute, o le tau o tiute ma lafoga, o vaega ia e talitonu le taofi e itiiti lava lona aafiaga i le tau o le soifuaga o lo o i ai, po o le tau o oloa olo o i ai lo tatou atunuu. E taua le silafia o tau o oloa ma le fesuaiga o tau e pei ona i ai nei.

O le tele o ni mafuaaga e ala ai ona siitia mauuluga ia oloa, i se iloiloga a lenei Matagaluega, ia o lena ua ou faailoa atu le isi vaega e mafua i le siitia o tau o oloa ona o tau o fefaatauaiga e afua mai i le siitia o le suauu ma tulaga faapena. A i ai foi nisi vaega ona o le toatele o kamupani nei o latou faatauina oloa faa-siia toa po o le wholesale, e pule lava latou i tau o latou oloa, ia pe pule foi lava latou i le taimi nei i le margin po o le pasene e tuu i luga o le tau o oloa. A auina mai le oloa mai fafo, ia o lena ua outou silafia, e apply pea le tiute a le tatou Malo, ia e faapena foi le tatou VAGST, ia ona faaopoopo foi lea i ai o le excise tax, ia ona auina atu lea o le oloa i tua i le aufaipisinisi. Ina ua taunuu atu la le oloa i tua, o i ina lava la e tafilisaunoa ai le kamupani lava ia po o le faipisinisi i le mauuluga o lana tau. Masalo o le mafuaaga foi lena o lea e faapea ai ona faatau le pusamoa i le \$90 i le isi fale ae \$60 i le isi fale, ona o le tulaga e pule lava le kamupani ia i le tau po o le pasene e siitia ai le tau o lana ia oloa.

Peitai ina ua saunoa foi nisi o sui usufono ma o le isi foi mea o lo o silasila i ai le Kapeneta i le taimi nei, o le toe faatulai mai o le tatou Price Control Board. A o le mea lava lea na fautuaina ai foi le tatou Malo e le tatou Palemene i se tasi o tatou Fonotaga, ma e le natia, ia o se taimi leaga o lea e le o afio mai le Minisita e fitoitonu i ai le tatou Price Control Board, o lo o faapena ona auina atu lona gasegase pei ona taua. Ae ou te iloa o se taimi ona faatulai mai lea o le tatou vaega lea e toe vaavaai lelei ma faatonutonu ia tau o tatou oloa. E i ai lava le isi vaega lea o lo o faapea e matauina pea i saunoaga, e pei e foliga mai o lo o faapena lava ona fetuutuunai pe feaveai foi le tulaga lea i le tau lava ia o le tiute. Ia ma le tau o le VAGST e faapea foi le excise tax, po o le tau lea o oloa e tuu i luga o oloa i inei lava i totonu o Samoa.

O le tau o le tiute o lo o faatulagaina, o le tau lea e muamua ona faaee i tau o oloa e faaulufaleina mai Samoa. Sau loa le pusamoa tuu ai loa le tiute i luga. I le avea ai o Samoa ma sui o le WTO po o le Faalapotopotoga lea o Fefaatauaiga a le Lalolagi ma le sainsi ai o nisi o feagaiga, ia pei o i ina o lo o i ai le isi faafaigata lea, e le o tuusaolotoina tatou i inei, e pule lava tatou i tatou tiute. O le isi lea o vaega o feagaiga ma le WTO, le PACER PLUS ma le PICTA ma nisi foi o faafeagaiga ua faapena ona commit i ai le tatou Malo, o le mafuaaga lea e faapena ai le tulaga o le tiute. O lea foi na ou

faamanino atu le tulaga o le bound rate, o lo o i ai le laina e faatuaioia ai e le mafai ona tatou kolosia.

A o le tulaga lava ia o le excise tax, o le excise tax e pei lea o le tatou local tax e nofo tatou ma tuu i luga o tatou oloa. Masalo a vaevaeina le vaega lea o le excise tax, ia tou te silafia, e tele lava ituaiga category off o le excise tax. Muamua pei o le tulaga lea ua i ai i tulaga ia o taumafa po o mea ia e aafia ai le tatou soifua maloloina, e i ai mamoe ma mea ia ua tatou talanoaina, aemaise foi le tulaga o tapaa faapea foi ma mea o ava malosi. O isi ia vaega. O lo o i ai foi isi category o le excise tax, atonu o i ai ni Tulafono foi ia faale-siosiomaga, faapea foi vaega foi ia o luxury goods po o good foi ia e le taatele, ae pei o oloa nei e fiafia i ai tatou e le tele e ausia.

O le tulaga foi o lo o i ai foi electronics po o masini nei faatekonolosi, o le isi lena vaega e mafai foi ona apply i ai letatou excise tax. Ia pei o vaega na e lua, ae se i agai atu i nisi foi o saunoaga e pei ona tuuina mai ma faafesili mai. Ia masalo o le a muamua sau tala i le vaega lea o le faamalamalamaina o le tatou lafoga i le tatou vai. O le lafoga o le excise ua faatualga atu i lenei suiga i le taimi lenei, e 33sene le tau o le lafoga lea. Mo le tele o tausaga, sa faaee lava lenei lafoga i luga o le vai sa auina mai fafo, ae taatia lava le tatou fale gaosi vai i Samoa ona o lena taimi e le i tele ni fale gaosi vai i totonu o le tatou atunuu.

Ina ua tau faamalamalama le mataupu lenei e pei ona saunoa i ai le sui usufono o Aleipata Itupa i Luga, faapea foi nisi o sui usufono mamalu, o le tau o le vai faaulufaleina mai e taugata atu ona o nei oloa e faaee i ai le tau o le tiute e \$1 i le lita, e pei ona tatou talanoaina foi ananafi, faatasi ai ma le 33sene o le excise, ia faapea foi ma le 15% o le VAGST. Mo vai e gaosia i Samoa nei, na o le lafoga lava o le excise o lo o aoina mai vai nei. O lona uiga, a amata faamamaluina le suiga ua i ai nei e na o le 20sene le tau o le lafoga o le excise o le a faaee i luga o le vai o lo o gaosia i Samoa nei.

O lona lua o saunoaga foi sa agai i le tulaga lea o le suka lea o lo o auina mai pei ona fesiligia foi e le sui usufono mo Faasalelega 5 le tulaga o le suamalie o le suka ua auina mai totonu o le tatou atunuu, lea sa faapea o aso ia e tasi le sipuni ae suamalie le ti, a o aso nei ua tolu sipuni ae le suamalie le ti. Ia, o le faavasegaina o oloa lau Afioaga, e le fuatia i le suamalie, e faavasega i le ituaiga o suka, e i ai le suka enaena, le suka paepae, ia ma isi. O le mataupu e pei ona laga e le sui usufono, e tataua lava ona tuuina atu i le Matagaluega o le Soifua Maloloina, e pei o i latou na o lo o nafa ma le vaega lea vaega eseese po o le faavasegaina lea o ituaiga suka eseese. Ma e le o faamaonia foi pe moni lea tulaga pei ona saunoaina, ia pe ese foi le sipuni na e faaaogaina, a o le tulaga o lo o i ai, ia o lena ua fautuaina atu.

O le tuuaiga lea o fualaau faisua, o fualaau faisua e tataua pea ona toe faapupula atili atu pei ona fesiligia ai e le sui usufono mo Aleipata Itupa i

Luga. O fualaa faisua ia, e le o maua ma e le mafai ona toto i Samoa nei, o le mafuaaga lea ua ala ai ona auina mai si vaega lea. Ma e le toatele foi tagata i Samoa nei e taumamafa ai i ituaiga fualaa nei, pei la o le broccoli, o le cauliflower, off sprout ma mea faapena. Ia e seasea faatau e tagata ma e o le mafuaaga foi lena na ala ai ona taugata ona e le o se mea foi lele e te le taumafa ai i aso uma, ma e leaga e ese foi le maketi po o se segment po o se vaega o le tatou atunuu o lo o taumamafa ai.

Ia, o le tulaga o le talo ma taro leaves ma laupele, ia o lena e silafia foi e lau Afioga i le sui usufono mo Satupaitea, ia o mea na a i tatou nei, e le afaina, ae tatau lava ona i totonu o le classification o tatou codes ia e te saunoa mai ai ma le tatou lisi o oloa.

Ia, o le tulaga lena. O nisi vaega, o lea ua matau atu i le tele o fautuaga, ina ia ave le faamuamua i nisi foi o taumafa e tatau o lo o faapena ona fiafia i ai le atunuu, ma e moni lava saunoaga. Ae a ou maitaua foi e pei ona outou silafia le mea lava lea o faigaai, le eating habits a le tatou atunuu, e pei foi lele ua avea ma se aganuu i le tulaga ua tatou fiafia lava i le moa, o le mamoe. Ia na ota ola mai lava ita ia o le mamoe, moa, ae o se tulaga foi lele e le faigofie. Ae o le uiga lena o lau tala, e ese le taua o le tatou faasoa i lenei afiafi. E i ai foi le feau e fia momoli atu ona o tatou lava ia ma tulaga o tatou taumafa ma mea tatou te fiafia i ai, e seasea tatou o i nisi mea foi ia faigofie ma mama, e tatou te agai lava i le aano o manifasi, ia po o tulaga faapena i le taumafa mamafa. E pei foi ona ou taua foi i nisi vaitau, e i ai le isi toeaina o le matou aiga e tau lava e ia le mealololo o le fasipovi masima, o le fasimoli. E fiafia lava la ia i le tulaga lea, ma ua tele foi tagata ua ou iloa e pei ona saunoa ai foi le sui usufono lea o Magiagi, ioe, e i ai lava tagata e matua fiafia lava i le tulaga lea. O le taumafaiga la a le tatou Ofisa o Tiute, e le o se taumafaiga foi lele ina ia faataugata le soifuaga, ma o lea foi na agai mai le tele o fesili i aafiaga la o le fesuaiga lea i le tatou revenue ma tulaga faapena. O le galuega lava ia faifaipea a lenei Matagaluega, o le fetuutuunai. E pei foi lele o lo o i ai se metotia e faaoga foi e latou e fetuutuunai ai le tiute ma le excise i lea taimi ma lea taimi, ina ia maua ai se tupe maua a le tatou atunuu.

O le tali la o le fesili pei ona fesili mai ai foi le sui usufono mo Falelatai ma Samatau, ia e le natia, e maua le \$4 miliona a le tatou atunuu mai le revenue pe a faapea e faatino le tulaga lea i le tausaga e tasi. Ia, e ao pea, e le natia mea nei i le tou faafofoga mai, ona e taua, o lo o vaavaai foi lenei Matagaluega i le tulaga foi lele o lea ua tatou oo i le recovery stage o le tatou tamaoaiga. Ma e ao foi la ona faatino le matou matafaioi ina ia aua ne i alu tele i lalo le tatou tupe maua, ioe, ina ia mafai ona toe aumai i luga ma ia maua pea le target, pei o se vaegatupe na faapena ona taumafai ina ia ausia i lenei tausaga faaletupe.

O lo o taumafai foi le tatou tiute e ao mai le tatou VAGST, ma e o lo o i ai faafitauli o nei mea, ona o tatou lava o tagata o le tatou atunuu, e toatele

lava e le o lagolago ma pay le tax. Ae manaia foi lenei avanoa e tatau pea ona ou faapea atu, tatou taumafai pea e pay le tatou tax, leaga o i pei ona saunoa nisi o sui usufono o lo o faamoemoe i ai le tatou Malo e faatino ai a tatou galuega, galuega o aoaoga, galuega o le falemai, ia o tulaga uma lava faapena, e le tau faailo atu i lo outou mamalu. O le fesili foi a le sui usufono mo Salega, faapea o le a le mea e le taofi ai loa taumafa gaoa? Ia, e le mafai ona tatou faia lea tulaga. E pei ona faailo atu i le taimi ua tea, o lo o i ai tatou feagaiga ma nisi foi o tatou faalapotopotoga o le lalolagi o lo o faapena ona tatou galulue i le tulaga lea o le tiute e pei o le WTO pei o lenei ua uma ona tolaulau atu, pei foi e i ai le tulaga sa i ai le tatou mulipipi se i tulou, sa taofi e le tatou Malo, ia po o le tatou Malo foi sa i ai, ae ou te iloa na tetee e le WTO, ona e pei o se mea foi lele ua tatou nonofo lava tatou ma fai faafuasei ia avatu ai se tali vave foi lele i faamai le pipisi, a ua tatou le amanaia le tatou va ma le WTO e tusa ai ma le tatou feagaiga sa fai.

O le mafuaaga la lea e faamalulu atu ai, ia, e le mafai ona tatou faatino na o tatou lea mea, e ao pea ona tatou fesootai ma nisi foi o tatou paaga o lo o faapena ona avea ai Samoa ma sui.

O le tulaga foi na saunoa ai Salega faapea o le moa ae pamu i ai le vailaau maua ai le 2 kilo, ou te faamalulu atu i le tulaga lea.

Afioga Fepuleai Faasavalu Faimata Su'a: Faamolemole lau Afioga pe maua se avanoa?

Afioga Hon TUALA TEVAGA IOSEFO PONIFASIO: O lea ou te... ioe, e pamu i ai le vailaau...

FOFOGA FETALAI: Onosai mai le sui usufono o lea ua saunoa mai le Minisita e tau faaiuiu mai le saunoaga.

Afioga Hon TUALA TEVAGA IOSEFO PONIFASIO: Ia leai, lau Afioga i le Fofoga Fetalai, e faamalulu atu lea ou te tali i le tulaga foi pei ona aumai e le sui usufono. O lana saunoaga e faapea, a faapea o le moa e tasi le kilo, pamu loa i ai le vailaau 2 loa kilo. Masalo e le o se mea e faamaonia le tulaga lea, o le a taoto ai faapena.

E momoli atu lava le faafetai i nisi foi o sui usufono sa saunoa malamalama i lenei taumafaiga ona o le taua o le maua o sina faasiligatupe a le tatou Malo. E toe avatu lava lau faafetai e tusa ai ma lea tulaga.

O nisi o saunoaga faapea o le mea lenei o le sii i luga o le tiute i isi atunuu e strike ai, pei ona saunoa le sui usufono o Vaimauga, faapea o mea nei e solotetee ai tagata i le Malo. Ia, ou te iloa aua le faapopoleina i lea tulaga le tatou atunuu. E leai, o lo o i ai foi isi fuafuaga a le tatou Malo e faaitiitia ai le popolega lea na aumai e le sui usufono mo Vaimauga. Ia pei ona ou fai atu, e le na o le tiute e fua ai le lelei ma le leaga o le tatou tamaoiga. O lo

o i ai le fuafuaga a le tatou Malo i le tatou miliona o lo o faapena ona taumafai i ai le Minisita o Tina ma Tamaitai ma le tatou Malo, o lea lava matou te taumafai e tuuina atu, tuuina atu e avatu i tua ina ia mafai ona faatino a tatou atinae. Ia, pei o le tulaga lena aua le faapopoleina ailoga e toe oo Samoa i lena ituaiga mea o le solotetee.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai, pe maua se avanoa?

FOFOGA FETALAI: Onosai mai se i maea le saunoaga a le Minisita atonu e maua ai sou avanoa mulimuli.

Afioga Hon TUALA TEVAGA IOSEFO PONIFASIO: Faafetai. O le sui usufono mai Alataua Sisifo i le tulaga lea na saunoa ai faapea o le tele o le waste ona o le auina mai pea o komepiuta ma tulaga foi nei faatekonolosi po o electronics. Ia, atonu o lea lava o lo o manino le tulaga lena, o lo o i ai lava le vaega o le tatou Malo o lo o nafa ma tulaga o le lapisi, po o le tulaga lea ua mafafia ma tele le electronics auina mai, ae le mafai ona tatou aveesea le lapisi lea. Ou te iloa e le o se mea e faapopoleina ai le tatou tiute, e le o se matafaioi lena a le tiute ae ou te talia le tulaga lea. Ae o masini ia o lo o talanoa i ai le tatou Tulafono, e le o ni masini tetele foi ia, na o masini lava ia i le 2 kilo pei ona faatulaga mai i le tatou Tulafono Tau Faaofi, e i ai nai cell phones ma mea faapena e aoga i le faiga o tatou pisinisi.

O lona lua, e aoga foi aua foi le aoaoina o le fanau. O le isi lena mea sa silasila i ai le tatou Matagaluega i le iloiloga faatasi ai ma le tatou submission ia ma le lagolago mai foi a le tatou Chamber of Commerce ma nisi foi o tatou pisinisi. E pei o le mafuaaga lena ua afua ai le silasila a le Matagaluega ma tuuina mai se faaitiitia o lea tiute.

Ma o le isi itu, the other end, it's a consumer benefit. E moni e benefit company...

FOFOGA FETALAI: Ua ou vaelupeina le saunoaga a lau Afioga i le Minisita le Afioga i le Sui Palemia. Ia ua ou manatu foi leaga o lea ua tatou taunuu mai i le tatou taimi ua tataua ona fai se tatou malologa. Ia, ae faaaau le saunoaga pe a tatou taliu mai. E faataatiaese tatou Galuega mo le tatou malologa.

Na faataatiaese Taulumaga a le Fono Aoaio Faitulafono mo lana malologa i le itula e 8:45 i le po ma toe faaaau i le itula e 9:30 i le po.

FOFOGA FETALAI: Ou te faasilasila atu ua toe amatalia nei Taualumaga a le Fono Aoaofa Fautulafono.

E i ai le talitonuga ua matu i fau le taligasua i le paia o le Palemene i lenei afiafi ua maua foi se faasiligamalosi e faaauau ai le tatou galuega.

E faataatiaese le tatou galuega mo le malologa o lo o saunoa talifuaifua i le afioga i le Sui Palemia po o le Minisita foi lea o le Matagaluega o Tiute ma Tupe Maua i mataupu na laga e sui usufono mamalu i Tulafono Tau Faaofi o Teuteuga o le Tulafono o Faasologa o Tiute 2022.

A o le i tuu atu le avanoa i lau afioga i le Minisita, lau afioga foi i le Sui Palemia, e i ai nai sui usufono e toalua ia o Salega 1 ma Vaimauga 1, e na o sina avanoa lava se i toe tuu atu i ai, ia ona faauma mai lea o lau saunoaga ma faauma foi mataupu e pei ona laga.

Tulai mai le sui usufono o Salega 1. E talitonu o lea ua taaofai uma le saunoaga a le Sui Palemia i mataupu sa laga.

Afioga Fepuleai Faasavalu Faimata Su'a (Salega 1): Faafetai i lau afioga i le Fofoga Fetalai mo le avanoa. O lea foi ua matu i fau le taligasua ma le taumafataga i le mamalu o le Palemene. Ia ae e leai se agaga o lou tulai atu e faasagatau i le talifuaifua a le afioga i le Minisita.

E na ona ou fesoasoani atu lava i le uiga o le agaga o lenei itumalo i le vaega lea e talosaga ai pe mafai ona taofia. O le agaga o le talosaga, e le faapea o le a taofi aano o manufasi ia pei o le mamoe. Ia ae o le ituaiga mamoe lea e aumai lea e pei e mafafia lona aano.

O le agaga la lena e pei e mafai ai ona taofi le vaega lea ia e pei o le numera 3 pe a masalo i le faatulagaga o vaega ia. Ae manaia le aumai o le mamoe lelei lea e saunoa i ai le afioga i le Minisita, pe lelei lona taumafaina e le atunuu. Ae ou te le o faapea atu lau Afioga i le Minisita e taofi le aano o manufasi. E leai e na o le mamoe lava lea po o le aano lea e mafafia lona mea lololo. Ia lea foi na matau i le taimi o le taumafataga, e fai lava si lololo e le talafeagai ma le soifua maloloina. Ae o le aotelega lava, e lagolagoina e lenei itumalo le Tulafono Tau Faaofi. Faafetai.

FOFOGA FETALAI: Se i tulai mai lau afioga i le sui usufono o Vaimauga 1.

Afioga Sulamanaia Fetiaia Tauiiili Tuivasa (Vaimauga 1): Lau afioga i le Fofoga Fetalai e faafetai foi mo le taumafataga. Sa i ai lava le manatu e pei ua avea le talanoaina o mamoe sa faapea e o atu tali le sua i se mamoe i fafo. Ia ae faafetai mo le afioga i le Fofoga Fetalai ma le Ofisa mo le taligasua.

E tulai ma lou agaga faaaloalo leaga e ese le uiga lea ua faauiga ai lou manatu e le afioga i le Minisita. A matau lelei e le Minisita le lagona o lenei itumalo amuia Samoa, amuia Samoa e ese mai i atunuu la e sii loa se

lafoga solotetee atunuu la. O le uiga lena o le faamatalaga lena. O lea ua sii au lafoga ia sa tuusaunoa, o lea ua e tuu i ai lafoga sa tuusaunoa e leai se mea sa i ai. Ua a nei la? O solotetee la?

Ae o le uiga lena sa avatu ai, o le lelei o Samoa e leai sona tulaga faapena leaga e leai se tamaoaiga, ae faapena le tulaga lea e i ai. Ae pei o lea ua ese le tulaga lea ua e avea i ai le tulaga o le solotetee o fafo, lea na ou faapea atu ai e ese lava Samoa ia. O se taimi e sii ai se lafoga pe 1% lava pe a i atunuu la i fafo, e solotetee lava atunuu la ona o le tetee i mea ia o lafoga. Ae a Samoa? Leai se mea. O lea sa i ai le lafoga ua leva ona tuusaunoa, o lea ua e tulai mai loa, lea ua fai ai le lafoga lea ua 5%. O solotetee la Samoa?

Ae o le agaga foi e tatau ona faamanino atu i lau afioga, na fai le tulaga lenei, ona o le soifua maloloina. Ae le i faia le tulaga lea e pei o lea ua e saunoa...

FOFOGA FETALAI: O lea ua maua atu lou finagalo.

Afioga SULAMANAIA FETAIAI TAUILIILI TUIVASA: E pei o le agaga lena o le sui usufono e tetee ia le mea taua ae ese lava Samoa ia e le solotetee. E a? e faamoemoe lava i mea e maua mai i ona laufanua ma lona tamaoaiga. O le uiga lena lau afioga o na ua...

Afioga Peseta Vaifou Tevagaena: Lau afioga i le Fofoga Fetalai, pe a maua se avanoa lau afioga.

FOFOGA FETALAI: E te le i faauilavea lava e le i faia se malologa. Na fai le malologa... na tuu atu nei avanoa ona o sui usufono ia sa...

Afioga Peseta Vaifou Tevagaena: Lau afioga ona o lea sa taputapuai lava se i uma le folasaga a le afioga i le Sui Palemia ona o lea ua maua e lou nei sui usufono o saunoa le afioga i le Sui Palemia e sese le mataupu lea. E le mafai la ona nofonofo ai le itumalo lenei e tatau lava ona maua se avanoa.

Lau afioga i le Sui Palemia e ana le Tulafono, o le taua ia o le Tulafono, ou te le o tetee i le Tulafono. Ae atonu foi e lelei le mea lea na ou avatua, e tele lava ina le o maua le tele o le vaega o le tiute. O le mea lea o le suka suamalie aua e pei lava ona ou fai atu i lau lauga, e tasi lava le atunuu sa sau ai le suka i le tele o tausaga. O le taimi lenei, ua 4 i le 5 atunuu, lea ua sau i Thailand le isi suka, sau mai Initia le isi suka, ae o le tele o suka nei, e eseese le suamalie.

E pei foi ona saunoa le afioga i le Minisita o le Soifua Maloloina, i le puipuiga lea o le soifua ma le... e ala i mea ia o taumafa. O le uiga la o lau faamatalaga, afai la e le o silafia e le Tiute le eseese o le suamalie o suka

nei, e tasi la lea alagatupe e le o maua e le Matagaluega ona a silasila, e faamaonia lau tala, pe a e tago la e faatau le suka enaena. E i ai le suka lea e toeitiiti lava paepae, e i ai le suka... e aumai lea e eseese lava le taste, e eseese.

O lea la ua talanoa nei i le maualuga o tiute ia ua faaee i luga o oloa ia e aafia ai le soifua, o lona uiga, tasi la lea o vaegatupe e le o maua. E oo foi i le masima, E mafua mai la le eseese o le suamalie o suka mai lea atunuu, e mafua mai i le sua o eleele a lea atunuu ma lea atunuu. Ia e na ona ou fesoasoani atu i le tulaga lea.

FOFOGA FETALAI: O lea ua maua atu le finagalo o le sui usufono mamalu.

Ia lau afioga i le Sui Palemia, ia po o le Minisita, ia faamaea maia lau saunoaga o lea ua faamaea mai latou na faaali mai o latou finagalo.

Afioga Hon TUALA TEVAGA IOSEFO PONIFASIO: Ia faafetai i lau afioga i le Fofoga Fetalai. E leai se manatu e toe faaumiumi se manatu. E tatou te malolo, o le tele lava i le tali atu i finagalo faaalii tuuina atu ae e le i faia le tatou malologa.

Ae o nai mea totoe lava nei e pei ona saunoa ai nisi o sui usufono, e pei o le tulaga lea e pei ona saunoa le sui usufono o Vaimauga 1, o le tulaga lava lea o lana saunoaga, e tasi loa le pasene solotetee loa. E pei o le tulaga lea e pei o lau oe lava saunoaga i se tulaga faalauaitele. Ae le patino pe manino mai ia atunuu ia aua e le faapena atunuu uma. E eseese uma lava atunuu, o le tele foi atunuu sa ou nofo ai, e leai lava ni solotetee. E faaali finagalo o tagata, ia ae pei ua 2 sitepu ua e oo i ai fai mai solotetee.

Ia ae o lea ua maua atu lou finagalo, atonu e sao i se isi itu, ia ae e... e fua foi le saunoaga i le mea e tatau ona i ai. Masalo o le a le afaina lea tulaga o lea ua e saunoa manino, i le agaga na e aumaia ai le mataupu. O lea foi ua toe saunoa le sui usufono o Salega, i le mea lava lea o le tulaga o taumafa ia o aano o manifasi o lo o tele ai le gao. Ia pe leai se faiga foi lea e taofi ai. O le mea moni lava, ua uma ona ou tali atu i le tulaga lea e tuusaoloto Samoa i oloa e aumai ma oloa e le mafai ona aumai i totonu o le atunuu ona o lo o i ai aiaiaiga faava-o-Malo e ao ona i ai feutanaiga, ma fuafua lelei le tulaga lea. A lea foi ua maua atu le agaga e pei ona e saunoa mai ai.

O nisi foi vaega e pei ona saunoa foi le sui usufono o Satupaitea, e taua tele ia te au lau saunoaga i lou saunoa mai faapea, o le taimi, e pei o le taimi lea ua aumai ai lenei Tulafono. Masalo na maua lava i lau faamalamalama i le taimi ua tea, o lenei Tulafono na tapena mai i le tausaga e 2019 i le tou taimi a o tulai mai foi le tou faigamalo, ma na tuueseina ina ua lata ina fai le palota. Ina ua maea le palota, sa toe aumai i luga e lau Matagaluega aua e le i aveesea lava ma le Matagaluega. Na taoto lava le mataupu o le mataupu tuua e tatau ona toe faaauau ma toe iloilo.

Mo le silafia, o nei mataupu pe a toe aumai i luga, e toe faasolo i le process e pei o le tulaga sa i ai o le faagasologa lava ia i ai feutanaiga i totonu o le Matagaluega, ia ona faapena foi lea ona faailoa mai i le Minisita, ia ona faasolo foi lea o galuega a le Matagaluega o Tiute ma Tupe Maua i le tuuatu lea o le mataupu lenei po o le fetuutuunaiga o tiute nei mo le tatou Revenue Board mo se latou foi iloiloga. A maea, ia o lo o i ai foi ia fesootaiga ma isi o kamupani ia faapea foi le Chamber of Commerce e pei ona taua e pei o i ina e i ai le faasologa lea toe foi mai foi lea i le Matagaluega ma le Minisita, ia ona faapena loa lea ona tuu atu i le Minisita i luma o le Kapeneta, ina ua aumai na o se tali mai i le Loia Sili, e faamaonia ua lelei uma tulaga ua taoto ai le Tulafono.

Ia o le isi lenei mea e faamalie atu ai, ia o lea lava sa faagasolo, ae o le taimi nei, o le taimi ia ou te iloa e le taua. Ae i ai le... e pei ona e saunoa, pe i ai se mafuaaga ua aumai ai i lenei taimi. Ia o lenei mea ua avatu ia le faamalamalamaga e leai se isi taimi. A tuu foi se i aumai i le masina fou po o le tausaga fou, atonu e relevant lava pe taua foi lau fesili. Ae o lenei mea ua tali atu, ona ua pau lava o le taimi ua oo i ai le faagasologa o galuega, ia lea ua tulai mai ai le Tulafono.

Maumau foi pe a na o se Tulafono e mafai ona faatino i lalo o le tofa ma le faautaga a le Kapeneta pei ona i ai tatou Tulafono Faatonutonu e mafai lava e le Kapeneta ona fesui le schedule ia po o le pepa o faamatalaga lea e i ai le lisi o tatou tiute. Ia ae peitai, o nei mea, ia e alu lava i le faagasologa, e iu mai lava i le Palemene, mo le finagalo foi o le Palemene e pei la ona i ai le aso.

O le isi tulaga e ese le taua, ona e matauina foi lea, so o se mea lava e saunoaina foi, e i ai le itu lelei e i ai foi le itu faalelelei. E moni lava, ae o le talosaga a le sui usufono i lenei afiafi, se i tatou silasila i itu lelei o le Tulafono ona o le tele lava o saunoaga ma finagalo, e faamamafa lava i le taugata o le soifuaga, o le tulaga o meaai gaoa ma mea faapena, ae silasila i le itu lelei o lo o taumafai le tatou Malo ina ia faaitiitia le tulaga o faamai le pipisi. O lenei mea, e le na o le Tiute, o lo o matou galulue ai foi ma le Ofisa o Faatoaga ma Faigafaiva, o i latou lea e taumafai e faatino le tulaga lea o le substitution, ia aua ne i aumai le moa mai fafo, ae fai tatou i inei.

Ou te iloa o lo o galue ai le afioga i le Minisita ae o le Malo lenei, ia lea faatoa 16-17 masina talu mai ona tulai mai. Se i manaomia sina taimi se i faagaoioi ai tatou poloketi nei, ia taumafai e uunai. O lo o i ai pea le agaga, e i ai se taimi ona tuu loa lea pe faaitiitia foi oloa e aumai fafo ae o le tele lava o oloa po o le taumafa, o le a mafai ona toto ma maua i totonu o le tatou atunuu.

E toe tasi lava si mea lea lau afioga i le Fofoga Fetalai, lea na saunoa le sui usufono o Sagaga 4 i le vaega foi lea faapea o lea ua aumai ma aano o manufasi foi le povi, solofanua, o le asini se i tulou. Ia tau lava ina faamanino atu le tulaga lea, e pei lava na faitau lau afioga i le faaulutala o

le pepa, a e silasila ifo i le laina na e i lalo ifo, o lo o i ai le laina na o le classification po o le faavasegaina o oloa. A e silasila ifo ai, e na o le puua lava ma le povi o lo o mafai ona auina mai i Samoa.

O tulaga uma na e pei ona e taua, ia e le aumaia i Samoa, o le ulutala na silasila ifo i ai, o kalifa. Ma o le tulaga foi o le heading e pei ona taua, ia e leai ni tatou control i mea na, ona o oloa na e international standard. Ia o se tulaga faapena, a o oloa ia o lo o i ai le tatou malosiaga e mafai ona faatino ai tatou tiute ma le excise. Ia o lona ua tau atu tulaga o le mamoe ia ma puua ia ma le povi.

O le tulaga foi lea o le pau mamoe, ia e leai se... ou te iloa lava e au ia e sese le faa-Samoa o le tauina lea o le pau mamoe. Masalo o le mea lea e saunoa i ai sui usufono, e pei foi lea o le mutton flaps. O le vaega foi lea ua masani ai tatou, i aso ia na ona faapea tamoe atu i le faleoloa e faatau mai se pauna mamoe. E leai lava faapea e patino se faamatalaga foi lea se itu po o se vaega o le mamoe. Ia o lona taimi e na o le ua mamoe lava ma le mutton flaps sa maua, ioe. Ae o lenei vaiata, ia ua maua uma ia ituaiga eseese e pei ona i ai ua mamoe, ia faapea ma vae mamoe, ia faapea foi ma lamb shanks, o le itu lea, ae o lo o maua pea ia mamoe ia e tau o le mutton flaps.

O lea ua ou faalogo atu i le afiafi nei ua tau o le pau mamoe. Ae o le tulaga lona, o lona ua outou silafia, mutton flaps lea e i ai nai ivitu e 1, 2, 3, 4 na tautau ese ai le mea lea e pei o se pau i le isi itu o le mamoe lea. Atonu la o lea ua tau e tatou lea mea o le pau mamoe. Ia ae e le i i ai se igoa faa-Samoa muamua sa tau lava e tatou o le mamoe aua e le i i ai nisi ituaiga mamoe. Ma e ou te faasao i le tulaga lona. O le mamoe lona ma le vaega ia, ia e lololo, masalo o le vaega na o lo o faaoga tele e le vaega lea e fai kekepuaa.

Ia ae o le talosaga i lo tatou atunuu, silasila ane i isi ituaiga taumafa. O lo o maua le vaega mamoe lea, ae ua o tatou iloa nei, e le lelei tele mo le taumafa, e le lelei tele foi i le soifua maloloina. E na o le pau lea lau afioga i le Fofoga Fetalai, ou te iloa e le toe faaumi se leo.

Ae o se avanoa lenei e momoli atu ai le agaga o le faafetai tele i sui usufono e tusa ai foi ma le tofa ma le faautaga sa faapena ona liliu ma tuuina mai i totonu o le tatou Palemene.

Afioga Hon Lautafi Fio Selafi Purcell: Lau afioga i le Fofoga Fetalai...

FOFOGA FETALAI: O lea ua tau faaiuiu mai ia le saunoaga a le Minisita, e i ai se mea... o na ua manino ae...

Afioga Hon Lautafi Fio Selafi Purcell: Leai o lea e tau faalogologo atu e pei e... e taua le... faafetai atu i le Afioga i le Minisita, lea e faatua se mataupu sa ou avatua. O le mea lea o le timing o le Tulafono Tau Faaofi

lenei. E pau lea o le a lailoa le afioga i le Minisita e tau laulau mai ia le process. O le agaga lena i le taimi ua aumai ai. Why this particular month? Afai o lea e amata mai i le 2019, po o sao ea lea... o faataatia le Tulafono lenei. E mafai lava ona tuu atu nai nisi masina po o se 6 masina ae o le faaoso i i le taimi lea o le a oo i le Kerisimasi ma le Tausaga Fou, o lea e fiafia nai tagata ua maua sina tupe lea ua amata ona toe kick off le tatou economy a o lea ua faasau tonu... e pei o le mea lena ou te fai atu ai e le mafai lava ona toe faataatia atu mo sina 6 masina?

O se taimi faapena se i solosolo lelei foi le tatou tamaoaiga ia ona toe faasau loa lea. O process lea na saunoa i ai le Minisita, ou te malamalama ai. E faagasolo faapena. Ia o lea la ua tau mai e le afioga i le Minisita e \$4,000,000 le tupe maua mai i le Tulafono lenei. O fea la e sau ai le \$4,000,000? Sau mai i totonu o taga a tagata faatau, lau Afioga.

FOFOGA FETALAI: Ia o lea ua manatu o le Nofoa, o lea ua saunoa manino le Sui Palemia o le Minisita, o le tali lava lena a le Malo. O le a foi se faatofalaiga ua uma ona silasila i ai le Palemia ma le Kapeneta, ma le aumaiga o le Tulafono, o lea ua manino le saunoaga ua leva na fuafua..

O le mea lea lau afioga i le Minisita se i tulai mai e faauma mai lau saunoaga ma...

Afioga Niuava Eti L Malolo: Faafetai i lau afioga i le Fofoga Fetalai, leai e taua ia o le mataupu e fia fesoasoani foi, ou te talanoa faa-Taitai o Komiti, i le tulaga o le oo atu o le tele o Tulafono i Komiti le tulaga lava ia i le translation e pei ona talanoa ai i le tulaga lea i le feliiuiga o upu.

E na o se fautuaga e tuu atu i le tapenaga o mea nei o Tulafono, e manaia lava le i ai o se Glossary foi lea i tua ina ia aumai ai le faa-Samoa ua faapea ona lesitalaina ina ia mafai ona faaaogaina i totonu o Tulafono. Ia aua i lou talitonuga, o le isi lea vaega e na te liliuina atoa le aano moni o lo o taumafai mai ai ni Tulafono e aumai i totonu o le Maota lenei.

Sa matou fautuaina le Ofisa foi o le Fono i tulaga i le feagai ma le faaliliuina o Tulafono mai i le faa-Peretania i le faa-Samoa ina ia galulue ma le Komiti o le aganuu o le Ofisa o Aoga, o lo o i ai foi tamalii ina ia taumafai e aumai ni upu aanoa e faa-Samoa ai terminologies aemaise lava terminology o le faa-Saienisi. E pei e manaia la lea ua talanoa la ua tupu i le afiafi lenei, e pei e tuuina atu ai se fautuaga i le tulaga lea ina ia taumafai e ave ia tatou upu nei i totonu o le Komiti lea o le aganuu se i aumai ai upu foi ia e aumai ai se faa-Samoa, ona e tele ina tatou feeseeseai ai. Ia o se fesoasoani atu lea lau afioga i le Fofoga Fetalai...

FOFOGA FETALAI: Ia o lea ua maua atu e le Ofisa Sili ma le Ofisa e ana ia fuafuaga mo le agai i luma.

Lau afioga i le Sui Palemia faauma mai lau saunoaga, faamaea mai lau saunoaga.

Afioga Hon TUALA TEVAGA IOSEFO PONIFASIO: Ia faafetai i lau afioga i le Fofoga Fetalai, ua toe laga nisi finagalo o nisi o sui usufono ona e taua foi o mea e ao ona faamanino i le afaifi nei. Ia aemaise foi ia le faafofoga mai a le tatou atunuu, ia leaga e taua ne i faapea ua o tatou tuuaia le Malo i le aumaiga o le Tulafono i lenei taimi a o lata le Kerisimasi. Ua o tatou iloa foi le tau o le soifuaga ma mea uma lava faapena.

E tatau lava ona ou faapea atu i lau afioga nei, i le alii Minisita po o le alii foi sa avea ma Minisita o lenei Matagaluega, ia e lava lou silafia i le process, faagasologa o... ae e te iloa foi na e te silafia e au o le commencement date po o le aso e amata ai ona faamamaluina le tatou Tulafono, ia ae silasila ifo i ai ia faatoa faamamalu i le tausaga fou.

E pau lava le mea i le afaifi lenei, o le tuuina mai o le Tulafono ina ia o tatou pasia pe a maea ona faaali o tatou finagalo, ia ae i ai se aso, o le mea lene e tuu mai ia te au nei ma le Matagaluega e ave ai se matou tuualalo la lea i se aso e talafeagai e amata ai le tatou Tulafono o le faamamaluina po o le faamalosi foi o lenei Tulafono.

Ia e na o le pau lea lau afioga i le Fofoga Fetalai i le tulaga foi i le faaliliuina o upu, ia o le mea foi lea o le alu lava o le tagata ia fai lana ia upu. O le pau mamoe tulou pei ona o tatou i ai, ia ae leai se upu faapena o agai i ai le Matagaluega po o le tatou Tulafono foi. Ia ae o le agaga lava lea sa avatu, ina ia taumafai ina ia faamatala ina ia vave foi ona malamalama ae leai se upu Samoa e faamatala ai lea ituaiga vaega o le manu ma lou faaloalo tele.

Ia e avatu ai foi se faamaualaloga i luma o le tatou Maota i tulaga foi o se upu ua sisi, ia na e silafia lava e le faigofie le faamatalaina o mea nei o Tulafono. Ia ae tatalo atu ina lafo ia i le nuu e leai ni tagata, ia ae faamagalo le sui usufono nei. Faamanuia le Atua i le tatou Fonotaga, faafetai tele mo lou avanoa, ae tatalo atu ia pasia loa le tatou Tulafono.

Lau afioga i le Fofoga Fetalai, faafetai mo lou avanoa.

FOFOGA FETALAI: O le faasilasilaga lenei mo le tatou faaliliuga. O le taimi nei e le o i ai se faafitauli i le faaliliuga o Tulafono Tau Faaofi. O terms faaletulafono, ua faatulafonoina, e le mafai ona toe suia e le tatou Ofisa. O le faasilasilaga lea i le faaliliuina o tatou upu.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faasologa o Tiute 2022 i lona faitauga faalua.

TULAFONO TAU FAAOFI O TEUTEUGA O LE TULAFONO O FANUA MA SUAFU 2022 – faitauga faalua.

FOFOGA FETALAI: Talu ai ua ou taulimaina ia le Tusi Faamaonia o le Tulaga Faanatinati ua maea ona sainia e le Taitai o le Maota i lenei Tulafono Tau Faaofi.

O lea o le a sagai atu loa le Fono Aoa mo le faitauga faalua ma faagasolo ai lava seia faitauina faatolu.

Ou te tapa lau afioga i le Minisita o Faamasinoga ma Pulega Tau Faamasinoga.

Tofa Hon MATAMUA SEUMANU VASATI SILI PULUFANA: Lau afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fanua ma Suafa 2022 i lona faitauga faalua ma ou te fia tautala faamalamalama i ai.*

Faaluaina e le Minisita mo Faatoaga ma Faiga Faiva, Minisita mo Leoleo ma Falepuipui, Pulega o mTinei Mu ma Faalavelave Tutupu Faafuasei.

FOFOGA FETALAI: Tulai mai lau afioga i le Minisita mo Faamasinoga ma Pulega Tau Faamasinoga e saunoa faamalamalama i le tatou Tulafono.

Tofa Hon MATAMUA SEUMANU VASATI SILI PULUFANA: E faatalofa i lau afioga i le Fofoga o le Fono ma le mamalu o sui usufono uma o le Fono Aoa Faitulafono. Malo le soifua.

E faatalofa atu i lau afioga i le Taitai o le Malo, lau afioga i le Palemia ma afioga i Minisita o le Kapeneta. Malo afua ailao ua maua i le alofa ma le agalelei o le Atua. E faatalofa foi i lau afioga i le Sui Taitai o le Itu Agai ma lena Itu, malo le soifua.

E faatulou i le paia o le usoga a Pule ma Tumua, Itua ma Alataua, Aiga i le Tai ma le Vaa o Fonoti, Tama ma o latou Aiga, Aiga ma o latou Tama, tulou tulouna lava.

E faatulou foi i le paia ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Faatuiolomotu, Tama a le Manuatele ma Tootoo o le Faleula.

O paia na o Samoa mai le taisamasama o le Tuimania seia paia le fafa o saualii. Nuunuu atu laia faatini o tausala aua o paia lava mai i le vavau e oo i le faavavau.

I le ava ma le faaloalo tele, ou te fia tautala faalauaitete, e faamalamalama atili le Tulafono o Teuteuga o le Tulafono o Fanua ma Suafa 2022 lea ua faitauina i lona faitauga faalua.

Lau afioga i le Fofoga Fetalai, ou te manatu o lo o manino ma malamalama lelei le tulaga e tusa ai ma le lape, po o vala faaetulafono i le

Tulafono Autu, le Tulafono o Fanua ma Suafa 2020 aemaise le aafiaga o le faagasologa o galuega a le tatou Faamsinoga o Fanua ma Suafa. O se mataupu sa afea ma talanoaina i a tatou Fonotaga i lenei tausaga. Ma o lea e na ona toe faatepa lava i nisi o vaega taua ina ia manino le auga ma le faamoemoe o lenei Tulafono.

Muamua, o le Tulafono o Teuteuga o le Faavae 2020 ma le Tulafono Autu Tulafono o Fanua ma Suafa 2020 ua maea ona toe tuuina mai ai le maliega, re-assent a Le Ao o le Malo i le Aso 14 Oketopa 2022. Ma e tusa ai ma le lomiga o nei Tulafono, o lo o manino ma faatumauina pea vaega nei. E le o aiaia i lalo o le Tulafono Autu tofiga o Faamasino o Fanua ma Suafa. E leai ni aiaiga i totonu o lenei Tulafono e tofia ma aveese ai Faamasino o Fanua ma Suafa, aofia ai Sui Peresetene, Peresetene Lagolago ma Faamasino o Faamasinoga Muamua. E leai ni aiaiga o faatulafonoina ai tuutuuga o nei tofiga, terms and conditions of appointment ma e leai ni aiaiga mo tofogi ma faamanuiaga e pei ona manaomia o Mataupu 104(4) ma le 104(g) o le Faavae.

Lua, e leai ni aiaiga i totonu o le Tulafono o Fanua ma Suafa 2020 e faasaoina pe faaauauina ai ia tofiga o Faamasinoga o Faamasino na faia i lalo o le Tulafono o Fanua ma Suafa 1981 lea ua soloia e le Tulafono Autu, ina ia mafai ona tofia e avee ma Faamasino i lalo o le Tulafono o i ai nei, ma e i ai le malosiaga i lalo o le Tulafono autu. O lea foi ua maea ona faamanino e le Faamasinoga Sili Supreme Court le tulaga lea ma e mautinoa ai o tofiga sa faia i lalo 1981, ua le faasaoina i lona tulaga atoatoa.

Tolu, o lo o i ai nisi aiaiga i totonu o le Tulafono autu, o lo o moomia ona toe teuteu ma fai i ai ni faasaoga ina ia manino ma atoatoa, ma ia ogatasi ma le Gagana Peretania ma le Gagana Faa-Samoa o lenei Tulafono.

Lau Afioga i le Fofoga Fetalai, o le mafuaaga po o le auga autu la o lenei Tulafono, ina ia foia lape faaetulafono e pei ona ou taua. O lenei teuteuga o le a faaofi ai i totonu o le Tulafono Autu, se vaega fou ua taua o le vaega 5 A po o le A. Ma o lenei vaega o le a faatulafonoina ai ia aiaiga mo le tofiaina o Faamasino o le Faamasinoga o Fanua ma Suafa. E aofia ai aiaiga ma tuutuuga o tofiga, terms and conditions of appointment. E faapea aiaiga mo le faamalolo le tumau, ma le aveeseina o se Faamasino mai lona tofiga.

O le tofiaina o Faamasino o le Faamasinoga o Fanua ma Suafa, e tofia e Le Ao o le Malo, i le faia i luga o le fautuaga a le Komisi o le Faamasinoga o Fanua ma Suafa. O lenei Komisi ua faavaeina i lalo o le Mataupu 104E o le Faavae. Ae ua aiaia i totonu o lenei Tulafono ana matafaioi, aemaise le malosiaga e faatonutonu ai ona lava tualumaga ma le faia o ni tulafono faafoe, ma ni taiala aua le faatinoina o ana matafaioi. O lea foi ua faamanino ma faatulafonoina agavaa manaomia mo le tofiga o le Sui Peresetene, Peresetene Lagolago, ma Faamasino o le Faamasinoga muamua o Fanua ma Suafa.

Mo le Sui Peresetene, o ia lea e mafai ona sui tulaga ma lagolago le Peresetene mo le faatinoaina o ana matafai. E aofia ai le faauigaina o le Faavae, ma e manaomia ona i ai se faailoga faa-loia, e pei foi ona manaomia mo le Peresetene o Fanua ma Suafa. O Peresetene Lagolago o i latou nei ua avea ma Faamasino o le Faamasinoga o Fanua ma Suafa, mo se vaitaimi e le itiiti ifo mo le 3 tausaga, ua i ai agavaa manaomia mo se Faamasino, o le Faamasinoga muamua o Fanua ma Suafa. O agavaa manaomia mo Faamasino, o lo o atagia ai le faatauaina o le Puleaga faapitoa o le Faamasinoga o Fanua ma Suafa, i mataupu tau i tu ma aga faa-Samoa e faasino i suafa matai ma eleele faaleaganuu.

Ua faaofi i totonu aiaiga mo le vaitaimi e umia ai se tofiga, tenure of office, e aofia ai tausaga e malolo litaea ai se Faamasino, pe a aulia le 68 tausaga o le soifua. Aiaiga mo le faamavae mai, resignation ma aiaiga mo le puipuia o faamasino mai tualumaga tau faamasinoga, judicial immunity. Ma aiaiga mo le faatulagaina o togoti ma faamanuiaga o le Peresetene ma faamasino o le Faamasinoga o Fanua ma Suafa.

Lau Afioga i le Fofoga Fetalai, o le isi vaega taua o lenei teuteuga, o le a aiaia ai le faasaoina ma le avea o nisi faamasino sa tofia i lalo o le tulafono 1981, ma faamasino i lalo o le Vaega 5A. O i latou foi nei sa umia tofiga faamasino, ina ua amata faamamalu le Tulafono Autu i le aso 15 Mati 2021. Ae le o aofia ai le tofiga o le Peresetene lea ua aiaia i lalo o le faavae, ma tofiga o faatonu, assessors lea ua le o toe i ai i lalo o le faavae ma le Tulafono Autu.

Mo le manino, o i latou sa avea pe taua o sui Peresetene i lalo o le Tulafono 1981, o le a avea ma Peresetene Lagolago i lalo o le Vaega 5A o le Tulafono Autu. Ma o i latou sa avea pe taua o faamasino Samoa, Samoan Judges, o le a avea ma faamasino o le Faamasinoga muamua o Fanua ma Suafa.

Mo le faatinoaina ma le sologa lelei o lenei teuteuga, o lea o le a avea ai le aso 15 Mati 2021 ma aso e amata faamamaluina ai lenei Tulafono, seia vagana ai le Fuaiupu 8. O le aso foi lea na amata faamamaluina ai le Tulafono Autu, seia vagana ai Fuaiupu 43 ma le 44. Ua teuteuina foi le Fuaiupu 67 o le Tulafono Autu, ina ia faaauau pea ona maua togoti ma faamanuiaga na agavaa ai i lalo o le Tulafono 1981, seia maea ona toe faatulaga togoti ma faamanuiaga e tusa ma aiaiga o lenei Tulafono.

O le agaga maualuga lau Afioga i le Fofoga Fetalai, ina ia mafai ona faaauau ma faagasolo galuega a le Faamasinoga o Fanua ma Suafa, i le amataga o le tausaga fou 2023, ma ina ia mafai ona tagofia ma fofogaina mataupu ma talosaga, petitions a le mamalu o le atunuu ua faauluina mai i lalo o le Tulafono Autu, le tulafono o Fanua ma Suafa 2020.

Mo le silafia, ua savalia nei le tausaga talu ona toa galuega a le faamasinoga, ona o le leai o ni aiaiga mo le tofiaina o faamasino. Ma e tusa ma le 204 talosaga ua faauluina mai, ae le o mafai ona tagofia e le

Faamasinoga muamua o Fanua ma Suafa i le taimi lenei. O lea ou te manatu ai, ua matua manino lava le manaomiaga o lo o i ai, mo lenei Tulafono, ma aiaiga e pei ona taua ma alagatatau ai, ona pasia i lona tulaga faanatinati.

O isi teuteuga ua aiaia i lalo o lenei Tulafono, o ni faasaoga ua manaomia, ma ia ogatasi ma le Faavae, ma ia ogatasi lelei le lomiga faa-Peretania ma le lomiga i le gagana Samoa.

Ae le i faauma atu se faamatalaga, e ao pea ona faamanino. O lenei Tulafono Tau Faaofi, ua faia ina ia faatino ai, ma ia ogatasi ma aiaiga ma moomiaga i lalo o le Faavae. E pei ona teuteuina e le Tulafono o le Teuteuga o le Faavae 2020. O lo o i ai aiaiga o lo o i totonu o lenei Tulafono Tau Faaofi, o lo o faasino i nisi o mataupu i lalo o le Faavae. E pei o le Fuaiupu 61A lea e faasino ma faia, e tusa ai ma le mataupu 104E (4) o le Faavae. E alagatatau ma e manaomia ona faia lea tulaga, ina ia fesootai atu i malosiaga o lo o i ai i totonu o le Faavae, mo le faiga o nei aiaiga. E leai ni teuteuga po o ni suiga o faia i le Faavae, po o ni malosiaga po o ni matafaiioi faale-Faavae, ua faaleaogaina i lalo o lenei Tulafono Tau Faaofi.

Lau Afioga i le Fofoga Fetalai, o nai teuteuga lena o le Tulafono o Fanua ma Suafa 2020, ina ia mafai ai ona faatino tofiga o faamasino, o le Faamasinoga o Fanua ma Suafa, ma i avea ma faaauau nisi o faamasino, sa tofia i lalo o le Tulafono ua soloia 1981, ma faamasino i lalo o le Tulafono Autu. O nei teuteuga o le a mafai ai ona foia nisi o vala faaletulafono ua i ai nei, ma toe faaauau ai galuega a le tatou faamasinoga o Fanua ma Suafa i se taimi vave.

O lea e tuuina atu ai le Tulafono o Teuteuga o Fanua ma Suafa 2020 mo felafolafoaiga a le Palemene mamalu. Ia saga faamanuia pea le Atua i lau Afioga i le Fofoga Fetalai, faapea le Taitai o le Malo, lau Afioga i le Palemia faapea sui usufono uma o lenei Palemene. Soifua.

FOFOGA FETALAI: Ua faamalo saunoa malamalama i lau Afioga i le Minisita mo Faamasinoga ma le Pulega o tatou faamasinoga. Atonu o lea ua faafofoga ma le totoa le paia o le Maota ma ua manino foi le folasaga, e pei ona tuuina mai i le mafuaaga o lenei Tulafono Tau Faaofi Toe Teuteu, ina ia faatulaga lelei ai le tatou faamasinoga o lo o to'a. Ae o lo o manino foi le saunoaga, e le o afaina ia le tatou Faavae, ina ia manino sui mamalu i lea tulaga. O lea ua saunoa manino le Minisita, e le o afaina lo tatou Faavae, ina ia faafaigofie ai foi a outou saunoaga, ina ia faapena ona faagasolo ai le tatou galuega. Ae ou te talitonu o lea ua fofola i lumamea o le Maota, le mafuaaga o lenei Tulafono ua faanatinati ai.

O se avanoa lenei e tuuina atu i le mamalu o le tatou Maota.

O lea ua tulai mai le sui usufono mo Anoamaa 2, tulai maia lau Afioga i le Sui Taitai.

Tofa Hon LAUOFO FONOTOE NUAFESILI PIERRE LAUOFO:
Faafetai i lau Afioga i le Fofoga Fetalai, e masalo o le a ou amata atu ia i le matou Itu i le Tulafono Toe Teuteu lenei, ua faataoto mai. E faafetai i le Afioga i le Minisita i le saunoaga faamalamalama, ua manino ai nisi o vaega lea sa taumate.

Lau Afioga i le Fofoga Fetalai, a toe tepa i tua i le taimi sa filifilia ai ma tofia e le Maota lenei le Komiti Faapitoa e suesueina ma toe lauliliuina le Lipoti a le Susuga i le Failautusi o le Fono, sa faataoto i le Laulau-a-Fono lenei ma faailoa mai ai ni lape o le Matagaluega i Tulafono e tolu, o le tasi o Tulafono o le Tulafono o Fanua ma Suafa lea ua toe teuteuina, e pei ona aumai i le Tulafono Teuteu lenei. Ia manatua foi o Tulafono na e tolu o le teuteuga o se vaega o le Tulafono Faavae, o le Tulafono o Fanua ma Suafa ma le Tulafono o isi mataupu tau Faamasinoga.

Sa faatalitali ma tau vaavaai po o le a se iuga e taunuu i ai le tulaga o le faatofalaiga sa i ai. Aua e pei ona aumai i le Lipoti a le Komiti, ma faasolo mai ai, ona pasia lea e le tatou Maota. O lea ou te tau manatua le tulaga e pei ona saunoa i ai le Minisita o le de-assent ma le re-assent o Tulafono e pei ona aumai, e pei ona pasia e le Maota. O lona uiga o lea sa pasia le vaega lea sa aumai e le Lipoti, o le toe faataatiaese o le saini a Le Ao Mamalu o le Malo, o le Tulafono lea na sainia, i le aso 15 Mati 2021. Ona maua ai lea o le avanoa e toe tuu i totonu teuteuga sa pasia e le Maota lenei. Aepeitai, sainia e Le Ao o le Malo le Tulafono lena, ae le i tuuina i totonu teuteuga na.

E pei foi ona manino le saunoaga a le Taitai o le Malo le Afioga i le Palemia, e pei e fa kopi sa i ai, ae i ai lava eseese o kopi ia e fa.

Sa i ai la le manatu lau Afioga i le Fofoga Fetalai, i se avanoa e toe faataoto mai ai le Tulafono pe a maea ona re-assent i Le Ao o le Malo i le Laulau-a-Fono i le Palemene, mo le silafia e le Maota lenei, ia teuteuga ia ua tuu i totonu, ma ua toe ave i le saini a Le Ao Mamalu o le Malo, o lona uiga o le re-assented Act. Aepeitai la e oo mai i le aso, e pei o lea e le i faataoto i luga o le Laulau-a-Fono, mo le silafia e le Palemene. Ae taua i lou taofi le tulaga lea, ae faafetai ona o lea faatoa ou faalogo atu nei i le saunoaga faamalamalama a le Afioga i le Minisita, o lea na toe re-assent, pe na toe saini Le Ao o le Malo, i le masina o Oketopa i le tausaga nei. A o le de-assent, o lea e le o maua po o le a le aso na de-assent ai le Tulafono muamua lea na sainia e Le Ao o le Malo i le aso 15 Mati 2021. O vaega ia pei sa fia oo i ai se tautalaga, ona e taua i lou taofi le manino o piriota ia. Aua o teuteuga o le Tulafono Faavae, o i ina lea e maua mai ai pe fanau mai ai le malosiaga faale-Tulafono e teuteu ai le Tulafono o Fanua ma Suafa lenei ua tatou vaavaai i ai.

O lea la ua aumai teuteuga ia, ae pei ona ou fai atu, e le o manino tonu ia au ma lou sui po o a tonu teuteuga ia na tuu i totonu o le re-assented Act i

Le Ao o le Malo, lea na sainia e Le Ao o le Malo. E pei ona faalogologo atu foi i saunoaga faamalamalama a le Afioga i le Minisita, o le isi vaega....

FOFOGA FETALAI: Ia malie lau Afioga i le sui usufono, se i tuu atu le avanoa i le Taitai o le Malo le Afioga i le Tamaitai Palemia.

Afioga Hon Fiamē Naomi Mataafa: Ae le i see ese le Sui Taitai o le Itu Agai i le mataupu lea e taua, o le gagana tatou te faaaogaina. O le upu lea e faapea mai foi lea o le suiga po o le amendment. Lau Afioga i le Fofoga Fetalai, a tatou manatua le galuega a le Komiti, na lipoti mai i le Maota lenei, ona e 4 lomiga eseese o le Tulafono lea o Fanua ma Suafa 2020. O le galuega la, e le o ni teuteuga po o ni amendment, o le galuega a le Komiti sa fautuaina ai le Palemene ma tatou talia, o le faasaoga. O le faasaoga o le Tulafono na pasia e le Maota lenei. O lona uiga o le Tulafono lea na ave e toe saina, faasolomuli mai le isi sa saina muamua, ae toe avatu le faasaoga, o le faasaoga na ioe i ai le Maota lenei, i luga o le Lipoti a le Komiti sa iloiloaina, ia lomiga e 4, lea na nenefu ai tatou, nenefu tatou, nenefu le Faamasinoga, nenefu le lalolagi o e sa tilotilo i le Tulafono. Aua o aiga uma e i ai a latou mataupu i le tatou faamasinoga lea, ae ua le ma iloa po o fea o lomiga ia, o le sao lea. O le toe faamanino le mataupu lea e saunoa mai ai le Sui Taitai, e le o ni teuteuga, o le faasaoga. O le mea na pasia, o le Tulafono i le Nofoaiga talu ai. Ma le faaaloalo.

FOFOGA FETALAI: Ou te iloa o lea ua manino i lau faafofoga mai le Sui Taitai, o lea ua saunoa manino le Taitai o le Malo i le faatulagaga o le tatou galuega.

Tofa Hon LAUOFO FONOTOE NUAFESILI PIERRE LAUOFO: O lea ua manino, masalo o le upu lea sa agai ai foi le mafaufau, o mea ia sa taua o lape o le Lipoti a le Failautusi o le Fono. E tusa o vaega ia na pasia e le Maota ua pau mai, e le i tuua i totonu o le Tulafono lea na saina e Le Ao o le Malo. A o teuteuga ia, o teuteuga o le Tulafono o Fanua ma Suafa lea e agai atu ai sau talanoa. O le mafuaaga foi lena ou te le i fai atu ai, e toe aumai ii e pasia i le Maota. A lea na ou fai atu ai, e leai se galuega o le toe pasia, aua ua uma ona pasia e le Maota vaega na.

Afioga Hon Fiamē Naomi Mataafa: O i tonu lava mo le silafia e lau Afioga i le Fofoga Fetalai, na ou tu atu ai e faamanino, ina te i ua sese lau faalogo, ae pei o le saunoaga a le Sui Taitai, e pei e foliga mai, o le teuteuga na fai agai i le Tulafono lea na ave i Le Ao o le Malo. E leai, o le faasaoga na ave i Le Ao o le Malo, lea foi ua saunoa mai ai, e le toe aumaia e toe faamaonia e le Maota lenei, aua o lea na fai le tatou galuega, e faasao le lomiga, ave loa i Le Ao o le Malo.

Tofa Hon LAUOFO FONOTOE NUAFESILI PIERRE LAUOFO: O le vaega tonu lava lena o lea e agai atu ai le lauga. O teuteuga la e pei ona aumai i le saunoaga faamalamalama a le Minisita, i le Tulafono lenei o lea ua taoto i le Laulau-a-Fono.

O le isi vaega lea e pei e matau atu ma aumai foi i le saunoaga faamalamalama, e faaauau ai Faamasino, po o nisi foi o Faamasino o lo o galulue pea i le taimi nei, e vagana ai le Peresetene lea talu ai nei lea ua faamalolo. O lea ua faamalolo i le tulaga foi lea o se finagalo o se tusi na ave i ai, e pei o le Lipoti lea sa maua. Ae o le mea lea e agai atu i ai.

Afioga Hon Fiamē Naomi Mataafa: Lau Afioga i le Fofoga Fetalai,

FOFOGA FETALAI: Se i tulai mai lau Afioga i le Palemia.

Afioga Hon Fiamē Naomi Mataafa: O le mea e fia faasao, o le tofia ma le filifiliga o le Peresetene, e le faia i le Tulafono lea tatou te talanoa ai nei. E fai i luga o le Tulafono Faavae, ma o le Faavae lena na fai ai le filifiliga o le Peresetene i le tulaga lea ua i ai nei.

FOFOGA FETALAI: O lea ua manino lau Afioga i le Sui Taitai.

Tofa Hon LAUOFO FONOTOE NUAFESILI PIERRE LAUOFO: O le tulaga tonu lena o lea e agai atu ai le mataupu lea e tau avatu, aua foi o lea e agai mai. O le Tulafono Faavae, lea e aumai i totonu lea e mafua ai ona maua mai le malosiaga lea e teuteu ai le Tulafono lenei. O la e aumai e manaomia le 2/3 o le Palemene e faamalolo ai le Peresetene. O lena e tau agai atu i ina se faamatalaga, ina ia agai atu i le point lea e tau avatu. Ona a silasila i le tulaga e pei ona aumai, o le 104E(3), o lo o aumai ai le process e faamalolo ai le Peresetene. O le malelega a Le Ao Mamalu o le Malo, aumai i le Maota, ona fai lea o le palota i le 2/3, ona sosoo mai lea o grounds po o mafuaaga.

FOFOGA FETALAI: O i ai se mea faapena i le Tulafono Tau Faaofi lea tatou te talanoaina?

Tofa Hon LAUOFO FONOTOE NUAFESILI PIERRE LAUOFO: O lea e aumai i le Fuaiupu 61.

FOFOGA FETALAI: Saunoa mai lau Afioga i le Tamaitai Palemia.

Afioga Hon Fiamē Naomi Mataafa: E lelei lava le faasolosolo manino o le tatou mataupu, e foliga mai o lea ua tatou oo i le filifiliga o le

Peresetene, ae le o i ai i totonu o le teuteuga lea tatou te talanoa ai. Atonu lau Afioga i le Fofoga Fetalai, a maua le taunuuga o le Tulafono lea na taatia ai, i le maea ai o le saina a Le Ao Mamalu o le Malo. O le taimi na faamamalu ai le Tulafono o le Faamasinoga 2020, i le leai o se aiaiga e filifilia ai Faamasino o le Faamasinoga o Fanua ma Suafa, e amata mai lava i le Peresetene, faasolo mai ai i isi Faamasino o lo o i ai. O lona uiga, i le gagana tuusao, ua faaleaogaina, ua faaleaogaina Faamasino uma lava o le Faamasinoga o Fanua ma Suafa i le faamamalu o le Tulafono lea o Faamasinoga o Fanua ma Suafa 2020. O lea e mafua ai le to'a o le galuega a le faamasinoga. Ma na oo foi le mataupu lea i le Faamasinoga.

E na o le pau lava lea lau Afioga i le Fofoga Fetalai, o le Malo i lalo o aiaiga o le Faavae, e gafa le Malo ma le filifilia o le Peresetene. O le filifilia ma le tofia o isi Faamasino o le Faamasinoga o Fanua ma Suafa, e i lalo o le Tulafono lea. O le filifiliga o le Peresetene, lea e i lalo o le Faavae, o le matafaioi lena a le Malo. O lea na fai loa e le Malo lana filifiliga i luga o le faaleaogaina, ioe, o le faamamalu o le Tulafono lea o Faamasinoga o Fanua ma Suafa 2020, faaleaogaina o tofiga uma o le Faamasinoga. O le matafaioi ma le nafa o le Malo, filifili le Peresetene. O lea ua fai le galuega a le Malo. O le tapenaga lea ua aumai e le Minisita, o lea o le a filifili ai isi Faamasino o le Faamasinoga. O le mea lea e fia faamanino lau Afioga i le Fofoga Fetalai.

FOFOGA FETALAI: E masalo o lea ua saunoa manino le Tamaitai Palemia, se i avatu se fesoasoani a le Nofoa lau Afioga i le Sui Taitai.

Tofa Hon LAUOFO FONOTOE NUAFESILI PIERRE LAUOFO: Lau Afioga ou te le o talanoa i le mea la e saunoa mai ai le Palemia. O la e sao uma mea la e saunoa mai ai, ae le o le vaega le la o lea ou te talanoa atu ai. O lea ou te talanoa atu, o le faamaloloina po o le faatulaieseina o le Peresetene, lea ou te talanoa atu ai, i le Fuaiupu 61I. aua o le malosiaga lea e fai ai le 61I, e tafe mai pe fanau mai i le 104E (3) o le Faavae. O le Faavae la, 104E (3), la e talanoa mai i le 2/3 lea la ua sii mai i le 61 lea i le Tulafono teuteu lea, ae o lea ua pau mai le 2/3. Ua le aumaia ai i i, o le mafuaaga lena o lea ou te talanoa atu ai. Ua le aumaia la le 2/3 i i, e tau fola atu le folasaga e tualuga i le fesili e fia malamalama. O le tulaga lena o lea e agai atu ai, aua o lea ua aumai i le 61 i i, ua leai se 2/3 ae aumai na o grounds.

FOFOGA FETALAI: Fai mai sau malologa o lena ua tau faaletonu mai lou siufofoga.

Tofa Hon LAUOFO FONOTOE NUAFESILI PIERRE LAUOFO: Aua e te popole lau afioga, o lea e matua lelei lava.

FOFOGA FETALAI: Se i tuu atu le avanoa i le Minisita.

Afioga Hon Faualo Harry Jeffrey Schuster (Minisita mo Leoleo ma Falepuipui, Pulega o Tineimu ma Faalavelave Tutupu Faafuasei):

Faafetai lau afioga i le Fofoga Fetalai, mo le avanoa. O le saunoaga lea sa agai i ai le Sui Taitai o le Itu Agai, e pei ona laga e le Palemia, e sao e i ai le Vaega 104 lea e faasino i ai le Tulafono lea. O le tulaga lea i le faamalolo ma le tofia o le Peresetene lea na tea atu nei, o le mea lea na tupu i le Peresetene lena, o le mea faaletulafono. Na pasia lava le Tulafono lea na i ai muamua, a faitau a outou Afioga i le Tulafono na pasia e sui sa i ai i totonu o le Maota lenei, e i ai le mea faaloia, ae sui mai se Tulafono tuai i se Tulafono fou, e i ai le mea e tau o le savings provision. E i ai faaupuga e faapea, o tofiga ma faamanuiaga uma sa maua i lalo o le Tulafono tuai 1981, e toe faaaogaina uma lava tofiga na i lalo o le tofiga fou lea. E le i i ai se mea faapena na tusi i lalo o le Tulafono lea na pasia i le Maota lea. A outou faitau i Tulafono tuai ia, na eseese uma kopi e fa, toe faitau i le kopi lea na toe faasao e le Afioga i Le Ao mamalu o le Malo, na misi ato lava le mea lena. O le mea ua tupu, fono le Maota, faaleaogaina le 81, ae leai se mea na tuu i totonu o le malosiaga lea, e toe tofia ai le Peresetene sa i ai i le taimi lena, ma toe tofi ai le Faamasinoga lea o Fanua ma Suafa lea na tofi i lalo o le 1981. O le faaupuga la faaletulafono lau Afioga, ua laps le appointment, ua laps uma i lalo o le Tulafono. E leaga e leai se tofiga i lalo o le Tulafono, e tofi e faavavau e tuufau. Na fai e le Tulafono, faamuta e le Tulafono. Ae le i manino la le mea lea, e le i faia le mea lea i le Tulafono lea i le Tulafono lea tatou te talanoa ai i le taimi lenei. O le mataupu la e i totonu o le Tulafono, a faapea e i ai se masalosaloga o le sa Peresetene e sese le mea lea e fai, pe le sao le mea lea na fai atu ai, o le Faamasinoga la e tali i le mea lena.

Ona o lea na laga e le Faamasinoga, e le mafai ona toe lote se Faamasinoga e faaulu, talu ona pasia le Tulafono fou, e leai se malosiaga o le Faamasinoga e fai ai, o le laps i le Tulafono.

Tofa Hon LAUOFO FONOTOE NUA FESILI PIERRE LAUOFO:

Lau Afioga i le Fofoga Fetalai, e le faia se ma finauga faa-loia ma lou uso. O lena foi e silafia e lau afioga. O lea ou te malamalama i savings provision lea e take care ai le transition period, ae o lea ou te malamalama lelei i le mea lea e saunoa mai ai lau afioga i le Minisita, ae le o le mea lena o lea ou te talanoa atu ai. E ese lava le mea lea ou te talanoa atu ai. Se i silasila ane i le 104E (3) o le Tulafono Faavae ma le 61I o le Tulafono Teuteu lea e aumai. O lea e sii mai i ai, ae o lea e pau mai le 2/3, e le o aumai i totonu i i, i le 61I. O le uiga la o lau tala, e le o ogatasi le Tulafono Faavae ma le Teuteuga lea e aumai i i, i le 61I.

FOFOGA FETALAI: Tulai mai lau Afioa.

Afioga Hon Fiaame Naomi Mataafa: O le mea e fia faasao e faapea lava au ia, na manino ananafi i le tou faasoa i le 61I, o lea e faapea mai i lona puipui muamua, e tusa ai ma le mataupu 104D (3) o le Faavae. O lona uiga, e tau mai ai i i, o la e aloaia aiaiga o le Faavae i le tulaga o le faatea po o le faamalolo o le Peresetene.

FOFOGA FETALAI: Ou te iloa ua manino lau Afioa i le Sui Taitai.

Tofa Hon LAUOFO FONOTOE NUAFESILI PIERRE LAUOFO: E le faaumiumia foi se faafinauga i lea mea. E pau lava le mea silasila ane i le (3), lea e mafua ai le teuteuga lea e aumai, o lona e fai mai, the President should not be removed from Office accept by the Head of State on address by the Legislative Assembly carry by not less than 2/3. O le mea la lona o lea e pau mai i le sii lea e sii mai i totonu i i, ae ou te le o taumafai atu e puipui le Peresetene talu ai, e leai. O lea ou te talanoa atu au i le aumaiga o Tulafono ia, ne i ave ave oo i le Faamasinoga, ona faapea foi lea...

FOFOGA FETALAI: Ou te faamalie atu i le Sui Taitai, o lea ua saunoa le Palemia ma le Taitai o le Malo i le faauigaina o le Tulafono lea ua i ai.

Tofa Hon LAUOFO FONOTOE NUAFESILI PIERRE LAUOFO: Ioe, o lea foi ua maea lau mataupu lea na avatu, o lea o le a faaauau, o le a see ese ma lea mataupu. A o lea ua manino o lea ua taoto lou manatu i lea vaega o le Tulafono. O le mea la lea e pei ona ou vaavaai atu i le tulaga lea lau afioa, o lea ua aumai i le Tulafono le tulaga lea o le faamamaluina, po o le tulaga o le aloaia o ni faaiuga, po o gaoioiga sa faia e le Peresetene po o Faamasino ma le Faamasinoga, e amata agai i tua, amata mai i le aso na faamamalu ai, agai i tua e tau i le aso 15 Mati 2021. O lea la e aumai i i, o le aso 15 Mati 2021 e pei ona aumai, o le aso lona lea na saina ai muamua Le Ao o le Malo, o lona uiga o gaoioiga ma mea o faaiuga na fai mai i le taimi lona e oo mai i le taimi e faamamalu ai le Tulafono Teuteu lenei o lea ua fai mai o le a aloaia uma. O le uiga la o le mea lea pei e aumai i i i lau vaai e apply retrospective i le Tulafono lenei i faaiuga uma na fai e le Peresetene ma Faamasino ia ua seei totonu i i sa tofia i lalo o le Tulafono o le 1981.

E pei o lau vaai lona iai i le aumaiga lea aumai ai ma faataoto mai ai le vaega lea. O lona uiga la e pei e foliga o lo o i ai se masalomia pe na valid faaiuga uma ia sa fai i lea vaitau.

Afioga Hon Fiaame Naomi Mataafa: Lau Afioga i le Fofoga Fetalai o se mea e fia faamalamalama ma e taua le mataupu lea e laga mai e le Sui Taitai o le Itu Agai ma le masalosologa po o le mea o na e agai i tua le vaega o le Tulafono lea e faasao ai ni mea sa faatino na o le pau le mea ou te manatu ina ua oo le mataupu lea i le Faamasinoga na fai ai le faaiuga a le Faamasinoga, e le mafai e le Faamasinoga ona lotea ni mataupu e amata mai i le taimi na faataatia ai le Tulafono Fou lea 2020 ae mafai ona galue pea i mataupu o loo i totonu pea o galuega a le Faamasinoga i le agai atu i tua ae faaaogaina pea le Tulafono o le 1981. Ou te manatu o se faiga lea a le Faamasinoga na taumafai e fesoasoani i le to'a lea ua i ai i le Faamasinoga.

Ae o lea laga mai e le afioga i le Sui Taitai o le Itu Agai ma sa ou fesiligia foi le Tamaitai Minisita e uiga i le aiaiga lea ma o le mea moni lava ia. Ae a faapea lava ua siliga i le tausaga o toa le galuega lea na o le pau lea o le gaioiga na ou iloa e au ia na fai i luga o le faaiuga a le Faamasinoga ina ua momoli atu i ai le mataupu e leai se aiaiga o le Tulafono e tofia pe amanaia ai Faamasino uma o le Faamasinoga o Fanua ma Suafa. O lona uiga pe a mafai ona tatou faauigaina faaiuga na faia e le Faamasinoga o le taumafai lea e fai se gaioiga e faauma ai nisi o galuega o la sa feagai pea ma le Faamasinoga ae i lalo o le Tulafono tuai o le 1981 seia taumafai le latou gaioiga lea na fai ma lea ua tatou taunuu mai ai i lenei afiafi ma le Tulafono Toe Teuteu lea ua aumai e le Tamaitai Minisita e mafai ona tatou foia se tulaga atoatoa le toa o lo o feagai ma le tatou Faamasinoga o Fanua ma le Suafa. Ma le faaaloalo.

FOFOGA FETALAI : Ia lea ua manino le saunoaga a le Tamaitai Palemia lau afioga i le Sui Taitai .

Tofa Hon LAUOFO FONOTOE NUAFESILI PIERRE LAUOFO: O lea ua saunoa le afioga i le Palemia ia i le tulaga i Tulafono i le vaega lea ua agai ai la'u... ae pei o le mataupu lea ou te tatai a'u i ai ona o mea ia sa tagofia ma fai ai faaiuga ma gaioiga ia lea ua aloaia faale-Tulafono pe a pasia le Tulafono Toe Teuteu lenei. O lona uiga la ua tatau foi la ona toe faaauau ma le Peresetene i lona tofiga aua o lea ua toe faa-validate uma ana faaiuga fai e pei o le uiga lena o la'u vaavaai atu i lea foi vaega o le Tulafono. Ae manuia tele le Kerisimasi.

FOFOGA FETALAI: O le measili ua uma ona tomua mai lau afioga i le Sui Taitai, ia ou te talitonu o finagalo uma lava ia o lea Itu o le tatou malu.

Ia o lea ua avanoa le tatou Maota. Se i tulai mai le Igoamatua lau Fetalai Ale

Tofa ALE VENA ALE: Faafetai lau afioga le Fofoga Fetalai ua maua se avanoa o lenei sui usufono. Ia o paia ma mamalu o le tatou taeao liugalua ma le aso, o lea ua uma ona oo i ai fetalaiga ma saunoaga o le taeao. Ua uma foi ona paepaeulufanua e lau afioga i le Fofoga Fetalai paia o lenei Maota faapea foi le paia o le tapuaiga a Samoa.

Ae ua ou tulai atu ma le faaaloalo tele i lenei itula o le afiafi e fia faaalua se manatu e tusa ai o le tatou Tulafono ma e faafetai i lau afioga i le Tamaitai Minsita mo le Tulafono ua i lumamea o le Palemene i lenei taeao ma o loo tatou matua manino lelei ma malamalama i le toa lea e toa ai galuega a le Faamasinoga ona o fita lea sa faafeagai ai e uiga lea i le Tulafono lea na tulai mai lea na pasi ia pei e le i atoatoa na lelei na faatulai mai i lenei taimi. Atonu o le mea lea ua tulai mai ai nisi fita ma faigata a o lea ua manino mai i lenei afiafi i tulaga lea ua faataoto mai i le Tulafono lea ua lumamea nei. Pau le feteenaiga tele e pei ona i ai foi i le aso ananafi i le tatou Pre-sitting ona o lea e i ai ni finagalo o nisi e faapea e tatau ona iai le 2/3 e tatau ai ona pasi uma Teuteuga lea e finagalo le Minisita. Afai ae manaomia le 2/3 ia ao mai le 2/3 ou te iloaina a e tatau ona maua le 2/3 pe a e manaomia le pasia i lalo o le 2/3 o le Tulafono. Ae o lea e manino lava le folasaga a le Tamaitai Minisita e le o aafia tulaga o le Faavae.

O Teuteuga lea e moomia nei e le Tulafono lea ina ia mafai ona gasolo galuega a le Faamasinoga. O le mea la lea e lelei, tusa la o le mea lona lua ma le Tulafono ua i lumamea nei o le Maota, ou te faafetai i le afioga i le Minsita. O le isi itu taua ua momoli mai e le Tulafono lea o afioga i alii Faamasino o lea sa malolo litaea ile 65 tausaga ia ae o lea ua tuutuu atu i tua i le 70 tausaga.

Pau foi le itu lea fia fautuaina ai lau afioga i le Tamaitai Minisita ma le Tulafono, e silafia foi o le toatele o alii Faaamasino e oo atu talosaga i le tausaga 70, 71, 72 o lae matua malosilava lona mafaufau. E i ai se isi aiaiga e mafai ona toe faaauau i lalo o aiaiga toe talosagaina ma tulaga faapena a o le Tulafono ua i lumamea nei o le Palemene lau Afioaga i le Fofoga Fetalai, e matua talia lelei e le itumalo lenei o Faleata 4 le Tulafono. Manuia le tatou Fono. Faafetai .

FOFOGA FETALAI: Ia, tulai mai lau afioga i le Tamaitai Palemia.

Afioga Hon Fiamē Naomi Mataafa: Lau afioga i le Fofoga Fetalai afai ua leai nisi o sui e toe fia saunoa, e maitau atu foi i le tatou taimi.

Tofa Hon Lauofo Fonotoe Nuafesili Pierre Lauofo: Lau Afioaga i le Fofoga Fetalai, e tusa ai ma le teuteuga o le tatou lafo mo taimi faigaluega analeila tatou te faaiu i le itula e 11. E maitau atu e mafai ona faauma le faitauga faatolu o le tatou Tulafono i le taimi o loo faatulaga, ia a leai foi ia

e toe avanoa foi taeao e toe afiio mai ai ma fai le tatou Fono ae pule mai lau afioga

FOFOGA FETALAI: Ia o lea ua maitau atu o lea ua fou mai le sa o Aleipata Itupa i Luga.

Afioga FUAAVA SULUIMALO AMATAGA: Ia faafetai tele mo le avanoa. Atonu o lea ua manino tele i le tulaga o Tulafono ma mea e pei ona aiaia e faalelei atili ai tulaga foi e tusa ai ma le tatou Faavae o le appointment lea o tatou Faamasino ma le Peresetene, Sui Peresetene, aemaise foi o faamasino Samoa.

Na pau lava si vaega lea o si au faafesili , o so'u lea faatauvaava ma so'u vaivai ae taua i se tulaga e manino ai foi se faamalamalama a le Malo i le draft ina o le Tulafono o lo o i ai vaega ia e suesue atu e tutusa uma lava mea ia e aumai pe a faapea o le tulaga foi lele o le faamalolo po o se faatulaieseina o le Faamasino a o lo o i ai lava le faaupuga lena i le vaega Ae mafai ona faatulaiese se Faamasino na tofia i lalo o nei vaevaega e faia i luga i se fautuaga a se Komisi, i luga o mafuaaga nei, aemaise la o mea la ia i Faamasino. Ae a oo mai la i le Peresetene i le tulaga foi lele i le faamalolo e Le Ao o le Malo e tusa ai ma le 2/3 o le Palemene a o le vaega la lena (a) 61 vaega 1(a), o lo o i ai lava le vaega lea - may including criminal conviction foi lele, o le a i ai le faa-Samoa e mafai ona aofia ai se moliaga tau solitulafono ua faamaonia faaetulafono e pei o tulaga foi lele i le tapenaina o Tulafono nei.

O lona uiga o se vaiavaiga pei foi lele o se mea e tuu afaafa - may include e mafai, lona uiga e i ai foi isi faaupuga e ono le mafai ona o lea e i ai le upu - may be include i le tulaga lea. O le tele foi o nisi o Tulafono a faapea a ua ou manao a vevela ia tu vevela ae aua fua le vevela ae pei e malulu le isi pito i tulaga foi lele pe i ai se mafuaaga e ala ai ona oo loa tulaga foi lele ina ia tausisi lava a solitulafono loa criminal conviction ia ua tatau loa ona aafia i le... Aua e i ai nisi faaupuga i le Tulafono faa-Peretania e tele lava ona faaoga le shall include lona uiga e tatau ona aafia faasolitulafono. E pei o se faafesili lea i le tulaga foi lele ina ia malamalama ai foi lo'u sui usufono aemaise le faafogafoga mai o si o matou itumalo faapea Samoa ia nao o le pau lea aua o lea te iloa sa ou faaiua foi la tatou fono talu ai i le taeao. A o lea ua ou vaai atu foi talu ai o lea foi ua maua nai minute ia faapea e tuu atu ai pea se fesili lea e fesoasoani foi i le malamalamaaga o si o matou itumalo. Ia faafetai tele lau afioga mo le avanoa.

FOFOGA FETALAI: Ia lau afioga i le Tamaitai Minisita lea ua... pe i ai se mea e te fia saunoa ai i luma o nisi o mataupu e pei ona laga.

Tofa Hon MATAMUA SEUMANU VASATI SILI PULUFANA: Faafetai mo le avanoa ae e foliga mai o sui na saunoa ua talia le Teuteuga seiavagana le fesili mulimuli lea o lea ou te le maua tonu po o fea lea e sau ai le fesili a le sui usufono?

Afioga Fuaava Suluimalo Amataga: Lau afioga i le Fofoga Fetalai ia o le a ou fesoasoani atu. O lea e i lalo o le 61(h) ia faapena foi 61(i) i le vaega 1(a) o loo tele a ona faaoga le vaega lea e tasi. Ae pei o si faafesili lea po o le a le eseese o le maybe included or shall include le...

FOFOGA FETALAI: Ia, o lea ua ou maua atu le agaga o le faafesili e pei o le faaupuga o le tusiga o upu o le Tulafono. Ia e faamalulu atu foi i le sui usufono mamalu, ia o ata lava ia o tusiga o Tulafono, e i ai lava vaega ia e pei ona taua e le sui usufono mamalu.

O le fesoasoani atu lena a le nofoa ina ia malamalama so o se Tulafono lava e i ai lava upu ia o le may ma le shall, o upu lava e masani ai mea o tusiga Tulafono. Ia, o le mea moni lena, o lea e faafesili ai le sui usufono mamalu ae leaga o lea ua uma ona faauigaina e le Kapeneta ma le faaupuina o le Tulafono. Ia o le tulaga lena mo le silafia. E le o se mea fou, o le mea lava e masani ai tusiga o mea nei o Tulafono. Ia, afai o le finagalo lea o le Palemia ma le Kapeneta ma le Faigamalo, ia o lena lau Afioga i le sui usufono mamalu. O le tulaga lena i le mataupu lea. Ma le faaaloalo.

Se i tulai mai lau Afioga i le Palemia, e i ai se mea e fia saunoa ai?

Afioga Hon Fiamē Naomi Mataafa: Ia lau Afioga, tatou malilie ia, o le Tulafono ua tusia, ua faagasolo. Ae manaia foi le manatu o le Afioga i le sui usufono, atonu a faapea lava ua malosi tele lona finagalo i le shall, ia faatu mai sana lafo e sui le may i le shall. Ailoga e ita ai se isi. Ae o lau Afioga i le... ou te tautala i le vaega lea i le Peresetene, ona o le vaega lena e aumai i le Maota leni i le tulaga foi lea e aumai i se tulaga aoatetele, ae fai le finagalo o le Palemene. Atonu pei o le mea lena ua faaogaina ai le upu e mafai, pe ua tataua ona fai. Shall or may i le faa-Peretania. Ae tatou malilie ia. Lau Afioga i le sui usufono, ua galo ia oe e i ai le faitauga faatolu a o lea o le a ta le 11?

Afioga Fuaava Suluimalo Amataga: Lau Afioga i le Fofoga Fetalai, o le a tatou alu ai ia i le tulaga pei ona saunoa le Tamaitai Palemia, ae pei o se mea foi lele na ala ai ona tuu atu i le tulaga foi lele, ia afai o lea e finagalo aua o le vaega lea i le E, o le vaega lea e toe aumai iinei i le Palemene ona e manaomia le 2/3. A o isi vaega lea e tai pei o le H lea po o le H, ia ou te iloa o le vaega lea atonu e tataua ona teuteu ai le tatou Tulafono, ae faatu atu ia se lafo, pe faaoga le maybe pe faaoga le shall faamolemole.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fanua ma Suafa 2022 i lona faitauga faalua.

TULAFONO TAU FAAOFI O TEUTEUGA O LE TULAFONO O LE FAASOLOGA O TIUTE 2022 – iloiloga auiliili

FOFOGA FETALAI: E tusa ai ma Tulafono Tumau 104, e amata le iloiloga auiliili i le Fuaiupu 2.

FUAIUPU 2: Ua teuteuina le Faamatalaga Muamua.

Faamaonia.

FUAIUPU 3: Teuteuga Faatupulaia i le Tulafono o Fua Faatatau o Lafoga e Gaosia i le Atunuu 1984.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o Teuteuga o le Tulafono o le Faasologa o Tiute 2022.

Faamaonia.

Na faagasolo le Tulafono Tau Faaofi o Teuteuga o le Tulafono o le Faasologa o Tiute 2022 e aunoa ma se Teuteuga.

TULAFONO TAU FAAOFI O TEUTEUGA O LE TULAFONO O FANUA MA SUAFA 2022 – iloiloga auiliili

FOFOGA FETALAI: E tusa ai ma Tulafono Tumau 104, e amata le iloiloga auiliili i le Fuaiupu 2.

FUAIUPU 2: Ua teuteuina le fuaiupu 2.

Faamaonia.

FUAIUPU 3: Ua teuteuina le fuaiupu 12.

Faamaonia.

FUAIUPU 4: Ua teuteuina le fuaiupu 43.

Faamaonia.

FUAIUPU 5: Ua teuteuina le fuaiupu 54.

Faamaonia.

FUAIUPU 6: Ua faaofi le Vaega 5A fou.

Faamaonia.

FUAIUPU 7: Ua teuteuina le fuaiupu 67.

Faamaonia.

FUAIUPU 8: Aiaiga faasoina ma aiaiga tau soloaiga.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o Teuteuga o le Tulafono o Fanua ma Suafa 2022.

Faamaonia.

Na faagasolo le Tulafono Tau Faaofi o Teuteuga o le Tulafono o Fanua ma Suafa 2022 e aunoa ma se Teuteuga.

TULAFONO TAU FAAOFI O TEUTEUGA O LE TULAFONO O LE FAASOLOGA O TIUTE 2022 – faitauga faatolu

FOFOGA FETALAI: Ou te tapa lau Afioga i le Sui Palemia po o lau Afioga i le Minista o le Matagaluega o Tiute ma Tupe Maua.

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faasologa o Tiute 2022 i lona faitauga faatolu.*

Faaluaina e le Minisita mo Faatoaga ma Faiga Faiva ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

TULAFONO TAU FAAOFI O TEUTEUGA O LE TULAFONO O FANUA MA SUAFA 2022 – faitauga faatolu

FOFOGA FETALAI: Ou te tapa lau Afioga i le Minisita o Faamasinoga ma Pulega Tau Faamasinoga.

Tofa Hon MATAMUA SEUMANU VASATI SILI PULUFANA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fanua ma Suafa 2022 i lona faitauga faatolu.*

Faaluaina e le Minisita mo Faatoaga ma Faiga Faiva ma le Minisita mo Leoleo ma Falepuipui, Tinei Mu ma Faalavelav Tutupu Faafuasei.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

FOFOGA FETALAI: Talu ai ona o lea ua tatou taunuu i le siui o tatou galuega sa fuafuaina mo lenei vaiaso, o lea foi ua tatou taunuu foi i le tatou taimi e pei ona i ai le tatou lafo.

O le mea lea e le itiiti le agaga o le faafetai o le Nofoa i le paia maualuga o le tatou Maota nei i le agaga o le fiafia ma le agaga o le faafetai ona o lea ua faaiuina ma le manuia le tatou galuega sa fuafua. E talitonu foi ia e le i faigofie le tatou galuega ma le savaliga i lenei lava aso, o lea lava ua tatou oo mai lava i afiafi faapenei, a o lea lava e faaaau le tatou galuega.

O le mea lea e momoli atu ai le agaga faafetai tele i lau Afioga i le Tamaitai Palemia ma le Kapeneta, aemaise foi Minisita Lagolago ma lea itu o le malu, lau Afioga i le Sui Taitai ma lea itu o le malu, ia o le agaga o le faafetai mo le tatou galuega i lenei aso. Ia, e talitonu lava ua fesoasoani mai le agaga o le Atua i lenei aso ua manuia ai faiva ma galuega faafeagai a lau Palemene i lenei aso.

O le mea lea, faamalo usufono faafetai le onosai, faafetai foi i lo outou faatoatoa. Ia e leai lava se faiva e asa ma se maumau. Afai foi ua i ai se upu a le Nofoa ua le tautamalii i le faafogafoga mai a le tatou Maota i lenei aso, ia ou te faamalulu atu. Talosia ia i le alofa o le Atua ia momoli atu lo outou soifua ma so matou ola aua foi le isi tatou aso Fono o i le lumanai.

Ae faafetai atu foi i le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo, faafetai mo la outou foi pitolaau i le lagolagoina o taualumaga o le tatou Palemene. Malo faafetai.

Samoa i ou tulaga faalupelupeina, e momoli atu le faafetai a lau Palemene i lau tapuaiga. Afai ua sala sa matou gagana i lau faafogafoga tapuai mai, ia alofa faamagalalo lau Palemene, a ia alofa le Atua i faiga malologa o lenei afiafi.

Ae tatou te le i tolopo, ou te talosaga atu i le sui usufono mo Safata 1 e saunia se tatou tatalo e faaiu ai le tatou Fonotaga.

Afioga Hon FIAME NAOMI MATAAFA: Lau Afioga i le Fofoga Fetalai, e faamalie atu i lou finagalo...

FOFOGA FETALAI: Ia saunoa mai lau Afioga i le Tamaitai Palemia.

Afioga Hon FIAME NAOMI MATAAFA: O lea ua maua ua e saunoa e faaiu le tatou Fonotaga taua nei, o le tatou Fonotaga mulimuli lenei o le tausaga. Ma e ao foi ona fai atu sa matou upu i lau Afioga i le Fofoga Fetalai. Tau ia ina matou faaleo le agaga o le faafetai i lau taitaiga o le Maota, faafetai i lou finagalo onosai. E tasi foi ae foi i lau saunoa mai ma

tau faamalulu mai, ia o le agaga lava e faapea foi ona talanoa atu ai i le tele foi o isi o tatou Fonotaga e tausila lava le tatou vanonofo i lo tatou va fealoai.

Ae ao ona faaleo le agaga faafetai i lau Afioga, le lagolagosua a le Afioga i le Sui Fofoga Fetalai, aemaise foi o le Ofisa o le Failautusi ma sui mamalu o le tatou Matagaluega.

E le mafai foi ona tuua ma fia piiama i le agaga o le faafetai i le galuega faa-Palemene, aemaise i afioga i Taitaifono ma sui o Komiti o le Palemene sa nafa ma le tele o galuega sa feagai ma le Maota i lenei tausaga. E le i tele naua ni Tulafono ua faagasolo mai i le Maota, a o Komiti ua nafa i latou i le tele o Lipoti Faaletausaga ua faapena ona tapena mai e Pulega e tauala mai i Matagaluega taitasi ma Minisita. A o le tino la o le galuega faa-Palemene, o lea sa tauave e Afioga i Taitaifono ma sui usufono mamalu o le Komiti.

Ma e avatu ai lefaafetai a le Itu lenei o le Pulega i le tauaveina o lena foi itu e faapena ona tali mai ma silasila le Palemene e tusa ma le faatinoga o gaoioiga a le Pulega mai lea tausaga i lea tausaga. E u ii le tele o tatou Lipoti amata mai le 2018, 2019, 2020, 2021, a o galuega e tatau ona fai. Ua matauina ua tele ina maape le tele o Lipoti ua taatia mai, e le o se galuega laitiiti, a o le agaga faafetai lea.

Tau ia ina matou faapea atu, tatou amata analeila i le tatou Fono Tatalo, ia faapena foi ona limataitaiina I tatou I le feau a le Faafeagaiga faapena ona faatonutonuina pea le sa o Samoa I le fingingalo o le Atua. Ae tau I ai tatou ona tatou faalologo ma faatalitali I lona finagalo. Matou faaiu atu ai sa matou faamatalaga i lau Afioga i le Fofoga Fetalai molimoli atu ai o matou momooga alofa ma faamanuiaga o le Kerisimasi faapea le Tausaga Fou. Manuia le tapuaiga a Samoa aemaise foi nisi o sui o le atunuu ua mafai ona tatou faatasi i lenei afiafi. Soifua ma ia Manuia.

FOFOGA FETALAI: Ia ua faamalo malele i lau Afioga i le Tamaitai Palemia, o le Taitai foi o le tatou malo. Ia atonu o lea foi ua faafofoga foi ma le totoa le paia o le maota aemaise foi le faafogafoga mai a le atunuu. Ia o lea ua e saunoa malele e tusa ai foi o le faaiuga o a tatou galuega o lenei tausaga ia aemaise foi o lea ua e faamanuia. Ia maua e lo tatou atunuu ma le Maota nei se Kerisimasi Fiafia ma se Tausaga Fou Manuia. Ia o le ofo alofa atu foi lena a le Fofoga Fetalai, ia maua e lau Afioga ma le paia o le Kapeneta faapea foi lea itu o le Maota, o sui usufono uma. Tatou tau fai maua fiafia uma se Kerisimasi ma se Tausaga Fou Manuia. O le mea lea ou te tapa lau Afioga I le sui usufono mamalu mai Safata Nu.1 e te faaiuina la tatou fonotaga i se tatalo.

Na tolopo Taulumaga a le Fono Aoaofaitulafono i le itula e 11:05 i le po seia aulia le itula e 9:30 i le taeao o le Aso Lua, 17 o Ianuari 2023.